



Planim mangro diwai long Boera viles...

Moa poto
long raun -
p4 na 5...

P6.

Lukim ol piksa
we Prins Charles
na Meri bilong
em Camilla i
bungim ol Wol
Woa 2 Veteran
lain bilong PNG
na Australia
long Ela Bis...



Lukim insait-
Raun bilong Prins
Charles na meri
bilong em Camilla ...

Mi Namba wan Pikinini bilong Misis Kwin



OPISAL KAMAP LONG PAPUA NIUGINI SANDE NOVEMBA 4

**Yo Ekselensi,
Praim Minista,
Ol man na meri,**

Mi namba wan pikinini bilong misis kwin, na wanpela ten lapan bilong Manus. Mi bringim bikpela tok amamas bilong Mejesti Kwin bilong Papua Niugini na olgeta haus lain bilong mi long dispela taim bilong Daimon Jubili bilong misis kwin. Mi tok pisin orait?

Tenkyu long yupela olgeta long bikpela welkam yupela i givim. Mi amamas tru long kam bek long Papua Niugini na long stap hia wantaim yupela long dispela amamas. Misis bilong mi, we em i namba wan taim bilong en long kam raun long hia, i save harim mi stori planti kain stori long dispela naispela kantri na pipel bilong en; mi amamas tru olsem nau em yet i kam lukim na pilim pasin bilong Papua Niugini, na lukim naispela kala bilong en.

Dispela em i bikpela de na wanpela gutpela piksa tru yupela i soim. Mipela olgeta i bung hia long makim sikspela ten sikis yia Misis Kwin i givim long wok bilong em long lukautim ol arapela. Mi save long luksave yupela i gat long He Mejesti, husat em i Kwin bilong yupela. Em i taitol em i kisim, na em i no surik long en.

Em i karim bikpela luksave long ol pipel bilong dispela kantri taim yupela i kisim independens long 1975. Mi tingim ol dispela selebren yet, taim mi, olsem mausman bilong He Mejesti stret, i kam hia long lukim belkirap na belsut atnaim long dispela kantri long bungim nupela laip bilong en. Papua Niugini i bin kisim sia bilong em long tebol bilong Komonwel ov Nesens, we nau, Daimon Jubili yia, i gat bikpela amamas tru. Mi ken tokim yupela olsem Kwin i amamas tru long ol dispela gutpela pasin na luksave yupela i givim em long Daimon Jubili bilong em.

Het tok long givim sevis long ol arapela, we lotu i tokaut long en tude, em i stap long as tru bilong ol dispela selebren nau, we mipela i kamap long en. Meri bilong mi na mi yet i bin amamas tru long bungim planti Papua Niugini manmeri tru, husat i givim taim na strong bilong ol long sapotim ol komyuniti bilong ol. Ol dispela lain manmeri i stap namel long yumi, na planti taim yumi no save luksave long ol. Tasol ol i stap long as tru bilong komyuniti bilong yumi.



Ol manmeri, mi askim liklik taim bilong yupela long mi tingting bek liklik. Mi bin mekim namba wan raun bilong mi i kam hia klostu fifti krismas i go pinis, bikos mi bin mekim skul bilong mi long Australia.

Mi no lus tingting long planti ol samting mi lainim long dispela raun bilong mi. Mi tingim strongpela lotu insait long Dogura Haus Lotu we i bin mekim bikpela senis long mi; na mi bin belsut tru taim mi harim olsem ol kundu long Wadua, i bin pairap sampela de pastaim long mi kamap. Strong na bilip bilong Papua Niugini kalsa i pas strong wantaim mi inap tude. Olsem na em i gutpela samting tru, long tok welkam long ol Papua Niugini i stap long Briten, i go long St. James Pales sampela de i go pinis, na mi na misis bilong mi i bin lusim ples bilong mipela wantaim pairap bilong kundu.

Mitupela wantaim i amamas long lukim ol pasin tumbuna i kamap hia long moning. Tru tumas, 'PNG Way' em i wanpela naispela prodaksen tru, we i soim sampela samting long dispela strongpela pasin kalsa dispela kantri i gat nem long en. Mi givim luksave long yupela long namba wan danis na singsing tru.

Mi laik stori liklik long Royal Pasifik Ailans Rejimen, we ol i mas pinis i kam na soim tru tru kala bilong ol. Mi bin bikpela wantaim ol stori long strong bilong ol Fuzzy Wuzzy Angels, husat i mekim kamap strongpela pait bilong ol Australia long Kokoda Trail. Olsem na em i namba wan bikpela amamas bilong mi taim mi kamap Kenol-in-Sif bilong yupela long 1984. Na mi amamas tru long kisim ol nupela Kala bilong yupela. Em i soim tru strongpela histori na tu, mi laik tok luksave long wok bilong yupela insait long rijenal asistens na intanesenel pis-kipling wok.

Sevis bilong yupela em i bikpela samting tru long dispela kantri.

Yupela olgeta lida, ol pikinini, ol sumatin, ol man na meri, ol lida bilong sios, na ol pipel bilong papua niugini. Mi na misis bilong mi, mipela laik tok tenkyu tru long yupela olgeta long gutpela pasin bilong amamas yupela i mekim long mipela long kam long Papua Niugini. Mi sori tru mi mas lusim yu kwiktaim tasol bikos mi mas go long sampela moa kantri misis kwin i bosim, na ples bai i kol liklik. Ayooo! Bamahuta bon dirava hese baine hanamo mui.

His Royal Highness Charles, the Prince of Wales



PABLIK WELKAM BILONG OL ROYAL HAINES LONG SIR JOHN GUISE STEDIUM – SANDE, NOVEMBA 4, 2012



TOK WELKAM i KAM LONG PRAIM MINISTA, HON. PETER O'NEILL, CMG, MP

OL ROYAL Haines, ol Sios Lida, ol bikmanmeri, na wan-kantri manmeri bilong mi.

Olsem Prais Minista, em i bikpela samting tru long mi long tok welkam long Yupela ol Royal Haines, Prins ov Wels na Yo Royal Haines, Dases bilong Cornwall, i kam long Papua Niugini.

Mi save olsem kantri – em moa long seven milian man, meri na pikinini – i bung wantaim mi tude long tok tenkyu long yupela i raun i kam lukim mipela, na long tok bikpela welkam long yutupela.

Yo Royal Haines, Prins ov Wels, nau i em i raun i kam lukim Papua Niugini foapela taim – na yu kam wantaim em long dispela bikpela taim long histori bilong mipela, Indipendens De 1975, taim yu makim He Mejesti, Misis Kwin, long taim mipela i kisim independens.

Yo Royal Haines, Dases bilong Cornwall, i mekim namba wan raun bilong yu i kam long Papua Niugini. Mipela i bilip olsem em bai no inap las raun bilong yu, na bai yu amamas long sotpela taim mipela i stap wantaim yu.

Yo Royal Haines, em yupela i kam hia bihainim askim bilong He Mejesti, Misis Kwin, Het bilong Stet bilong Papua Niugini, Het bilong Commonwealth, long makim wanpela bikpela taim insait long laip bilong He Mejesti – em Daimon Jubili bilong em.

Mipela i amamas olsem He Mejesti i askim yu long kam long Papua Niugini, na orait tasol long kam.

Insait long taim He Mejesti i stap, Komonwel i groa moa yet. Tude, Komonwel i gat 54 kantri olgeta. Long dispela, 16 em He Mejesti i stap Hed ov Stet long en.

Mi bilip monaki, long He Mejesti em yet, wantaim halivim i kam long Royal Famili, olsem yu tupela yet, em i gat mining yet, na i stap strong tude, olsem em i stap bipo.

Stronpela bel na pasin we He Mejesti i makim, na i save soim olgeta de na yia, em i wanpela gutpela samting bilong ol liklik kantri olsem Papua Niugini husat i gat planti kain kalsa na pasin.

Bihain long yu kamap Prins ov Wels, Yo



Royal Haines i givim He Mejesti bikpela sapot, na yu yet, na luksave yu gat long Papua Niugini, em i stret tasol olsem He Mejesti i askim yu na meri bilong yu long kam lukim kantri bilong mipela, long amamas wantaim mipela long selebretim Daimon Jubili bilong em.

Yo Royal Haineses, Papua Niugini i gat 37 krismas tasol. Monaki i stap planti sensuri pinis. Mipela i stap kantri aninit long foapela ten yia. Tasol mipela i wanpela skin kirap, kantri i wok long groa, na ol gutpela taim bilong en bai kam yet.

Mipela i bungim planti ol salens, tasol mipela i gat bikpela sans, sapos yumi lukautim gut, long givim seven milian man, meri na pikinini bilong dispela kantri, mobeta sindaun, na long kantri yet long kisim moa intanesenel luksave, moa long make m i gat nau.

Mipela i gat planti risos. Tasol salens bilong mipela em long developim ol gut, wantaim gutpela tingting na luksave – na long wei we em i lukim olgeta i kisim gutpela samting long sotpela taim, na long longpela taim bihain tu.

Mipela i gat planti gutpela samting, ne strong na bilip bilong ol pipel bilong mipela em i namba wan long ol dispela. Na tu, tumuna na kalsa bilong mipela, we nau Yo Royal Haineses i lukim, i stap strong yet.

Mipela em wanpela strongpela demokrasi – olsem ol nesenel ileksen bilong mipela i soim klia – na mipela i gat ol fridom we planti ol arapela developim kantri i wok traim painim yet, na i mas pait long kisim.

Bikpela hap bilong ol pipel bilong mipela i stap insait long ol rurel na nambis komyniti we hatwok na bilip bilong ol pipel bilong mipela, long wok bisnis na wantaim inap halivim i kam long gavman, bai lukim namba wan mobeta skelim bilong ol gutpela samting bilong kantri i groa.

Mipela i no save haitim ol hevi mipela i gat, na mipela i sot long traim givim ol besik sevis na gutpela infrstraksa i mas stap bilong kamapim strongpela ekonomik groa.

Tasol mipela i wok long mekim planti gutpela wok kamap insait long dispela na ol arapela eria tu – benefit bilong risos bum mipela i lukim bai halivim mipela long mekim moa long bihain taim.

Yuniti na gutpela sindaun bilong kantri bilong yumi, na ol pipel bilong yumi, bai bikpela samting moa taim ekonomi bilong yumi i groa, na yumi skelim ol gutpela bilong dispela groa, i go aut long olgeta kona bilong kantri.

He Mejesti, olsem Hed ov Stet bilong mipela, i save strongim dispela yuniti na belgut, long planti kain wei.

Long makim kantri, mi laik tok strongim luksave long He Mejesti olsem Hed ov Stet bilong mipela, na bai mipela i amamas sapos Yo Royal Haines i ken salim dispela toksave i go long He Mejesti, na gen, long tok amamas long em long bikpela luksave na mak em i painim long Daimon Jubili bilong en.

Yo Royal Haineses em ol bikpela manmeri bilong raun i kam long Papua Niugini.

Mipela i bilip yu bai amamasim sotpela taim yu kam na stap wantaim mipela, na bai yu kam bek gen klostu taim.

**HON. PETER O'NEILL, CMG, MP
PRAIM MINISTA**

Bungim ol manmeri, ol tisa na sumatin long Se John Guise stedium...



Raun bilong Prins Charles na Camilla - Sarere 3, Sande 4 na Mande 5, Novemba 2012...



Raun long Se John Guise stedium...



Planim mangro long Boera viles...



19^t

per MB

7pm - 7am

CELEBRATE TELIKOM'S X'MAS OFFERS

Off peak Internet Prepaid rate reduced for the rest of the Year

October until December 2012

24/7 Customer Care: Call 343 6789 or www.telikompng.com.pg

Conditions Apply

Manus wok plen kamap ples klia Nogat klia luksave yet long planti arapela samting

Neville Choi i raitim

WOK plen bilong developim Manus olsem bekim bek bilong yusim graun bilong ol long prosesim ol asailam sika i laik go long Australia.

Long Tunde dispela wik, Praim Minista Peter O'Neill na Australia Hai Komisina Ian Kemish, i sainim ol tok wanbel long kirapim wok developmen long Manus.

Tasol planti samting i no klia yet long wok bilong Australia gavman long lukautim bilong ol dispela lain refuji.

Laspela taim Manus prosesing senta i bin op na kisim ol asailam sika, senta i bin stap aninit long lukaut bilong Intanesenel Opis bilong Maignresen o IOM.

Makim bilong dispela intanesenel ogenaisesen, i bin

bihainim bikipela sut tok olsem Australia i wok bagarapim ol asailam sika long sampela ol prosesing kem bilong ol.

Mista Kemish i tok klia olsem Australia gavman i wok long toktok wantaim ol IOM na UNHCR, long sait bilong lukautim dispela senta.

Em i tok dispela wok bai go long wanpela praivet kontrakta, tasol em i no tok klia long husat kampani bai mekim dispela wok.

Namba wan bikipela hevi long ol asailam sika, em pasin bilong ol long straik na tambuim ol yet long kaikai inap ol i kisim luksave.

Nau yet, i gat ol asailam sika i protes long Nauru, narapela ples Australia i go kirapim bek senta long en.

I go moa long pes 9

Obama i presiden gen

LUKIM ol stori na poto bilong Ilekse 2012 long Amerika insait long PES 20 na 21

Presiden Barack Obama i winim gen sia bilong en bihain long em i rausim wanresis bilong em Mitt Romney.



MERI HULI:

DE Pot Mosbi siti i bin amamasim Daimon Jubili bilong Kwin Elizabeth, em ol pikinini bin bilas long kain kain naispela kala. Dispela meri Huli i soim klia stail bilong ol pen long pes. Kainkain provins i bin soim stail bilong ol, na dispela meri i bin go aut pinis long samsam long Sir John Guise Stadium long las wik Sarere. *Poto: Neville Choi*



FRI TOK TOK AFTA 2 MINUTES

Mekim wanpla 2 minute call lga long digita local mobile network na kisim narapela 8 minutes insait long dispela call fit.

WANTAIM DIGICEL CREDITS BLO YOU BAI ISTAP LONGPLA TAIM



www.digicel.com.pg



....the perfect choice

VITAMIN ENRICHED

More Easy, More Tasty, More Healthy.



Wan Skul long Bipo

Nicky Bernard i raitim

WANPELA wan skul bilong prins Charles long bipo i stap namel long ol bik manmeri husat i stap long tok gut bai long Prins Charles na meri bilong em long ples balus long taim tupela laik kalap long balus.

Pater bilong Anglican Lucas Bejigi bilong Popondetta em i wanpela sumatin bilong Martyres hai skul long

dispela prins Charles wantaim ol wan skul bilong em long Australia bin kam na skul wantaim ol.

Pater Bejigi wantaim meri bilong em bin harim olsem prins Charles na meri bilong Camilla bai kam raun long Mosbi na tupela kisim balus na kam long bungim tupela.

Pater Bejigi kisim wanpela olupela poto bilong bipo na meri bilong em kisim wanpela nek les na tupela go long ples balus long Mande na wetim

prins Charles na meri bilong em long taim bai tupela kalap long balus.

Bejigi na meri bilong em i kisim sans long sanap long lain na wetim prins Charles na meri bilong em, taim tupela kam bungim Bejigi, dispela man Oro i rausim poto bilong tupela na soim Prins Charles.

Prins Charles i tingim taim em na Pater Lucas Bejigi bin gat 18-pela krismas tasol na tupela bin bung long Popodetta na raun wantaim

long dispela skul senis program long bipo.

Meri bilong Pater Lucas Bejigi bin givim wanpela nek les long meri bilong poroman bilong em Prins Charles long tok gut bai na mas tingim PNG taim em lukim dispela nek les.

Pater Lucas i gat gutpela stori bilong em na prins Charles long dispela sotpela taim prins Charles na ol wan skul bilong em kam long Popodetta.

King Gat Olpela Su

MOSBI siti bin hot tru long dispela 3-pela de raun bilong Prins Charles na meri bilong Camilla. Tasol dispela i no nupela samting long bihain King bilong yumi.

Olgeta hap tupela go, em olsem liklik samting long Prins Charles, wari bilong em tasol long meri bilong em long wanem em nam-bawan taim em kam long Papua Niugini.

Dispela 3-pela de prins Charles na meri bilong em i wok long senisim klos bilong tupela long wanem hap tupela go long en.

Lek bilong prins Charles tu i wok long senis su tu long wanem hap tupela go long en inap long laspela de long Mande.

Long Sarere taim em na meri bilong kam, em putim wanpela nupela bilak su, long Sande em put nupela bilak pela su wantaim yunifom bilong ami, taim ol go antap long 14-mail em senisim yunifom na em putim braun pela su, na taim ol go long Boira em putim wanpela waitpela su.

Long laspela de long Mande su bilong em tu i senis, em putim wanpela olupela su bilong em bilong bipo, ol polisim tasol na em putim na raun long laspela raun bilong em.

Mi kisim laspela piksa bilong su bilong em long Ela Beach memoriel pak taim em go soim rispek long ol lain i pait long woa.



Pater Lucas Bejigi na meri bilong em. Poto Nicky Bernard.



EM MAS FEVERET SU YA: Olpela su bilong Prins Charles em putim long laspela de bilong em long raun long Pot Mosbi. **Poto na Stori Nicky Bernard**

EM I GUTPELA WEI BILONG WOKIM HAUS

Sapos em haus bilong silip, bisnis or komyuniti - lusim mipela i soim yu gutpela wei bilong wokim haus. Yu bai ino inap lukluk long disain na konstraksen long wankain wei ken! Force 10 haus bai sanap yet taim wara i tait, paia ino inap kukim, bai sanap strong long taim bilong guria, binatang ino inap bagarapim na haus inap long pinis long 14pela dei.

Seif, sekua, isi long wokim na eco frendli.



Hanmak bilong Jenny i kam gut

Veronica Hatutasi i
raitim

"AIYOO! Hanmak bilong mi bai go nau wantaim bikman ya!", wanpela meri i sanap klostu long sampela long mipela ol nius manmeri long waia banis long Jaksons Intanesenel teminel ples balus we mipela i go long lukim Prins Charles na lain bilong em i go i wok long tok olsem.

I go na i go nau na narapela meri wanwok i tanim na askim em long mekim klia hap tok bilong em.

"Mi tok olsem long grinpela ami klos we Prins Charles i werim na go," dispela meri klostu long mipela i tok.

Em nau, sampela long mipela i laik harim moa na stat long putim ol askim long en.

Jenny Toka em nem bilong dispela mama i gat 5-pela pikinini i wok long mekim dispela toktok.

Hap Rigo na Abau long Sentrel Provins, Jenny i wok wantaim Joie's Tailoring long Gordons Indastriel eria long Mosbi siti.

Dispela somapim klos kampani i bilong wanpela Filipino na Jenny i wanpela wokmeri long hap.

Kampani ya i save somapim klos bilong ol

PNG Difens Fos.

"Mi amamas nogut tru long lukim hanmak bilong mi long bikman ya na nau, em i karim i go long ovasis.

"Tasol taim bos bilong mi i toksave long mi olsem bai mi somapim klos bilong Prins Charles, mi bin surik stret. Tasol mi bin kisim na nau mi amamas tru bikos hanmak bilong mi i stap pinis long bikman na em i kisim i go pinis.

"Taim mi lukim Prins Charles i werim o putim dispela grinpela ami yunifom long stedium, bikpela amamas stret i bin kilim mi," Jenny i tok.

Jenny i bin amamas stret olsem sampela nius-lain i luksave na kisim stroi bilong em bikos long em, dispela i wanpela bikpela samting em i wokim long laip bilong em long somapim klos bilong wanpela Royel Famili memba bai kamap king bilong Ingran na 54 Komomwel kantri.

Mipela ol niusmeri i bin wokabaut i go na tok, tru yet, sapos meri ya inap somapim klos bilong bikman olsem Prins Charles, em i fit meri long somap. Na em inap statim kampani bilong em yet, tasol i moabeta long em i kisim fainensel sapot long mekim dispela samting.

Share in PNG's Biggest EVER Cash Prize Giveaway of **K1,600,000!**

Join our Monthly Winners

Simply complete eligible transactions with your BSP Card at any;

- ✓ **BSP ATM**
- ✓ **BSP EFTPoS Devise**
- ✓ **Via BSP Mobile Banking**

1 Grand Prize winner of **K1,000,000** drawn in December, 2012

All eligible entries received from 1st June until 30th November will be accumulative and included in monthly and grand prize draw.

One Million Reasons to bank with BSP!



www.bsp.com.pg

Find Us On:



Niupela Maggi Magic Teist

Wanpela kain kuting pauda

Bai givim **BEST teist** long kainkain kuk

TELE Apdeit

Telikom Deli Bonus Pek

Telikom nau i ofaim 'Bonus Pek' we i ken dabolim pripeid vois na data sevis long intanet brodben, Fiks Lain, WiMAX, EVDO intanet modem, na Fiks Waiales Fon.

Kredit dabol-ap bai givim ol kastoma moa taim bilong toktok na yusim intanet. Bonus i save go aut long taim yu risasim K5, K10, K20, K50, K100, na K200 Telikad na Rait kad tasol.

100% Bonus Ofa

● **K5**
Bonus inap long K5
Total Top-Ap inap long K10

● **K10**
Bonus bilong K10
Total Top-Ap long K20

● **K20**
Bonus bilong K20
Total Top-Ap long K40

● **K50**
Bonus bilong K50
Total Top-Ap inap long K100

● **K100**
Bonus bilong K100
Total Top-Ap inap long K200

● **K200**
Bonus bilong K200
Total Top-Ap long K400

Taim yu mekim fon kol, ol bonus kredit bilong ol on-net kols tasol na ol kol i go long ol arapela netwok bai kisim sasim long ol nomol ret.

Long save moa, ringim 24/7 Kastoma Kea long 3456789.



Call 147
Customer Care on 345 6789

Amamas long lukim kalsa long ples Boera ...Strongim tingting long lukautim ol mangru

Veronica Hatutasi i raitim

LUKLUK raun bilong Prins Charles i go long ples Boera ausait tasol long Mosbi siti i bin wanpela gutpela sans long Prins na misis bilong em, Camilla em Dases bilong Konwal, i lukim kalsa na kain laipstail pipel i stap long en.

Ol skul sumatin na ol asples manmeri na pikinini i bin stretim na bilasin ples na wetim Prins Charles na lain bilong em long moning taim yet.

Tasol wantaim ol wok long ekumenikal sios sevis long Se John Guise Stadium i kamap long moning, na bihain long en, lukluk raun i go long Netja Pak long 14 Mail, wokabaut i go long Boera i bin kamap long samting olsem 3 kilok long Sande apinun inap long 5 kilok samting.

Taim ol i go kamap long Boera Viles wantaim lukaut bilong tupela helikopta i wok long raunim ples, ol skul sumatin i bin welkamim ol.Prins Charles i bin opim nupela etpos we ol asples lain i bin putim kamap ol tumbuna singsing na danis, samitng we Prins Charles i gat bikipela intres (kalsa) long en.

Tupela i bin lukim ol hankraf samting ol asples lain i wokim na long namel bilong ples we ol i bin putim piksa

bilong lagatoi, ol lain i bin singsing danis na kisim tupela Prins Charles na Camilla i lukluk raun lukim lagatoi bilong ol.

Bihain long dispela, ol bin kisim Prins Charles na Camilla i go long nambis long lonsim wanpela "plaque" o hap raiting i bin givim nem bilong nambis olsem "Prins Charles Mangru Rihabilitesen na Konsevesen program.

Bihain long dispela, Prins Charles i bin planim diwai mangru long nambis long skruim dispela wok long wanem, em tu i strongpela sapota bilong lukautim gut environmen.

Planti ol ples lain i bin tok ol bai no inap lusim tingting long dispela wokbaut na lukim pipel na kalsa Prins Charles na meri bilong em Camilla i bin mekim i go long ples bilong ol.

Vada Dogo em tim lida bilong Mangrov planim projek long Boera Viles i bin tok, "Long Prins Charles i kam long ples na planim mangru bai kirapim tingting long mipela i opim ai na lukautim ol mangru bilong mipela na ol pis na kuka na ol abus bilong solwara i ken kam long mangru i ples stret bilong ol.

"Planim mangru projek i yusim tu ol yut bilong dispela ples long mekim sampela wok na ol i ken stap bisi," Ms Dogo i tok.



NAMEL LONG PIPEL: Ol ples lain bilong Boera i raunim tupela Prins Charles na Camilla we ol i amamas long toktok long ol asples na lukluk long ol kalsa na hankraf bilong pipel. **Poto: Nicky Bernard**

Praim Minista tok tenkyu long olgeta

BIKPELA tok tenkyu i go long ol pipel bilong Pot Mosbi long Royel Wokabaut bilong Prins Charles na meri bilong em, Camilla, i bin kamap gutpela stret.

Praim Minista, Peter O'Neill i bin tok olsem bihain long tupela na lain bilong ol i lusim PNG long wik Mande apinun.

"Mi makim maus bilong gavman long tok tenkyu i go long komyniti na moa yet, ol dispela i bin lukim olsem wokabaut i go gut tasol.

"Tupela Royel Haines i autim bikipela tok amamas long gutpela pasin pipel i bin soim long olgeta hap we tupela i raun i go long em. Ol bin lusim kantri long go long Australia wantaim gutpela memori bilong long sotpela stap bilong ol long kantri bilong yumi," Mista O'Neill i tok.

Mista O'Neill i salim bikipela tok tenkyu i go long ol skul sumatin husat i bin putim ol gutpela kalakala

bilas klos na putim ol tumbuna klos long soim kalsa we i bin luknais stret, na ol manmeri i bin putim ol tumbuna bilas long welkamim Royel marit. Na ol lain long ples Boera long mekim lukluk raun bilong tupela i kam gut tru.

"Long ol memba bilong PNG Difens Fos, Royel PNG Konstebulari husat i bin kontribut long wanpela we o narapela long mekim dispela wokabaut na selebresen i kamap gutpela stret, bikipela tok tenkyu long yupela olgeta," Mista O'Neill i tok.

Em i autim bikipela tok tenkyu i go long Minista bilong Spesel Ivents, Justin Tkatchenko long gutpela wok em i mekim na olgeta samting i ron gut.

"Mi harim olsem Royel wokabaut i kam long PNG i kisim gutpela midia ripot long Briten na Australia, na bikipela tok tenkyu i go aut long yupela olgeta," Mista O'Neill i tok.



HANMAK WANTAIM PRINS: Amamas i kilim Jenny long somapim klos bilong Prins Charles. **Poto: FM 100**

NBC na Kundu 2 kisim nupela Muving Studio



Nicky Bernard i raitim

NESENEL Brotkasting Komisin (NBC) na Kundu 2 i kisim ki bilong nupela studio bas bilong long Fonde wik i go pinis long han bilong Embeseda bilong Korea Whie-jin Lee.

Embeseda Lee, i kisim nem bilong Korea Gavman, na Korea Brotkasting Sistem husat ol givim dispela nupela studio bas long NBC na Kundu 2 i givim ki bilong dispela nupela studio bas i go long Menejing Darekta bilong NBC na Kundu 2 Memafu Kapera.

Mista Lee i tok dispela em bilong helpim wok bilong NBC na Kundu2 long mekim wok bilong gut na em bai isi sapos ol laik mekim laip kavaris. Em tok tu olsem dispela i soim olsem gavman bilong PNG na Korea bai ken wok bung wantaim.

Dispela muving studio i kam wantaim olgeta samting, i gat 4-pela kemra, bas yet jenereta bilong em na olgeta samting bilong studio i stap insait long dispela bas.

Korea Brotkasting Sistem tu i sainim pinis 3-pela enjinia bilong NBC long go kisim sampela skul bilong dispela studio bas long Seoul long Korea.

Korea Brotkasting Sistem (KBS) em namba-4 bikpela redio na TV netwok long Korea na dispela studio bas ol givim em liklik inap long rot bilong yumi.

Menijing Darekta bilong NBC na Kundu 2 Memafu Kapera i tok tenkyu long gavman bilong Korea na Korea Brotkasting Sistem long givim ol dispela nupela muving studio.

Dispela nupela muving studio i mekim nambawan wok bilong em long kisim Kundu 2 kam laip long taim bilong kam bilong Prins Charles long ples balus na long Se John Gais Stadium.

Manus wok plen kamap ples klia

I kam long fran pes

Wanpela wok painim namel long Hai Komisina Kemish, na Manus Gavana, wanpela teknikal tim bilong PNG gavman i mekim, i makim ol wok eria we Manus i nidim halivim long en.

Namba wan samting em wok stretim long Lorengau haus sik na ol arapela helt senta i stap klostu.

Ol bikpela rot long provins bai orait gen, na provins bai kisim 20 nupela klasrum, tenpela nupela haus slip bilong ol tisa, na tenpela skul opis.

I luk olsem bai gat wanpela teknikal skul long Manus.

Long prosesing senta yet, Mista Kemish i tok olsem dispela bai opim moa wok we ol kampani bai nidim.

Tupela lida i tok tu olsem olgeta wok bai ol i tendarim long ples klia, na ol lokol kampani tu i ken resis long ol dispela wok.

Na narapela luksave i kamap ples klia long dispela tok wanbel, em Mista O'Neill i tok wantaim sapot bilong Australia gavman, PNG gavman i laik tingting long ol dispela prosesing senta long Manus bai kamap wanpela Rijenal Prosesing Fasiliti olgeta nau.

Kar bilong polis

Bustin Anzu i raitim

MOROBE Provinsel gavman i bin helpim polis long provins long helpim ol long daunim hevi bilong loa na oda.

Moa helpim bai go long polis long wanem, bisnis i bilip Morobe Provins nau i kamap bisnis poin insait long kantri.

Dispela tupela kar i go long Wau polis stesin na narapela i go long Mobail Skwat 15, husat i save stap long Bulolo taun. Narapela K100,000 em ol i redim nau long baim ol samting bilong wok olsem gan na katres.

Long dispela wik Mande, Proavinsal Polis Komanda (PPC) bilong Morobe, Sif Inspekta David Warap i kisim kia bilong tupela ka long han bilong Gavana bilong Morobe, Kelly Naru.

Provinsal Administreta Kemas Tomala, papagraun kampani siaman bilong Hidden Valley (NKW), Rex Mauri, mausman bilong Morobe Mining Join Vensa (MMJV), Ken Kamaya, Lae siti polis bos, Sif Suprintenden Nema Mondiai, na nupela loa na oda siaman bilong Morobe, Peter Namus i lukim.

Dispela tupela nupela polis kar i gat olgeta samting bilong wok olsem ol lait na ol arapela samting i stap wantaim.

Dispela tupela kar em ol i baim long mani we kam long Spesol Sapot Gren (SSG) we Morobe Mining Joint Venture i peim takis i go long Morobe provins. Wanpela grup, ol i kolim Morobe Projek Menesmen Fan (MPMU) i lukautim na ronim mani long ol spesol projek bilong provins.

Provinsal Administreta Tomala i siaman bilong dispela grup.

Taim Gavana Naru i givim kia bilong kar, em i tok wok bilong polis em save kam aninit long lukaut bilong nesenel gavman, tasol ol i no inap karamapim ol lukautim Papua Niugini olgeta. Olsem na ol i helpim ol wantaim sampela samting bilong wok.

Kamaya i tok Bulolo na Wau em tupela bikpela ples we wok bisnis i save kamap na stap na ol i save olsem tupela ples mas stap gut na bisnis bai ron.

Olsem na ol i givim han long polis long mekim wok bilong isi wantaim kain helpim bilong baim kar bilong ol.

Papa graun kampani bilong Hidden Valley, we Morobe Mining Join Venture i wok long en, Mauri i tok planti moa kain helpim bilong loa na oda bai kam tasol namba wan samting ol i mas lukautim gut wanem samting ol i kisim.

Em i tok kain helpim em i no isi

long kamapim, na ol i mas lukautim gut na ol i no laikim ol pablik i go lukim ol na komplek olsem polis i no lukautim ol samting.

Mauri i tok ol i oraitim pinis K100,000 long baim samting bilong wok olsem gan na katres bilong polis long Bulolo na Wau.

Wankain helpim bai go long polis insait long provins olsem Lae siti, tasol ol laik stat long dispela tupela ples pastaim.

Em i tok amamas long Kemas long dispela gutpela luksave olsem siaman na lukluk long hevi bilong loa na oda long ol rurel ples.

Warap, bihain long sekim kar na lukluk insait i tok amamas i go long Morobe Projek Menesmen Fan long luksave long hevi bilong polis wantaim kar.

Em i tok long kisim nupela em i no isi pela rot na tok promis olsem ol vai yusim kar long mekim wok bilong polis long provins.

Baptais na konfamesen

Bustin Anzu i raitim

MARTIN Luther Semineri (MLS) long Lae i lukim sampela baptisim na konfamesen bilong ol pikinini long las wiken.

20-pela pikinini senisim pasin wantaim baptais na strongim bilip long karim diwai kros bilongJisas Kraus long nupela laip bilong ol.

Long Rifom Sande, 7-pela pikinini kisim baptais na 13-pela i kisim konfamesen.

Saplin bilong Semineri, Pasto

Emmanuel Yalamu na olupela sapling Pasto Wanggia Busem i bin go pas long baptisim na konfamesen.

Wanpela long ol dispela pikinini husat i bin kisim baptais em Peter Yama Labi, pikinini bilong olupela bos bilong polis long Momase na Asisten Polis Komisina (ACP) Giossi Labi.

Pter, husat i save pilai Australia Futbol Lig o AFL wantaim Carlton long Melbon, Australia, i bin kam bek long ples bilong em na senisim laip bilong em.

Labi i tok taim em i wetim ol pepa bilong em long stretim na go bek long

Australia long pilai, em i laik stretim em yet long save long Bikpela na mekim wokabaut bilong em na pilai.

Aninit long het tok: "Wanem samting tru em kaikai bilong bilip?", Pasto Yalamu i tok bilip long Bikpela em i stap wantaim wanwan Kristen bilip manmeri na ol yet mas save long dispela.

Din bilong STadis bilong Martin Luther Semineri, Pasto Geriec Sungga, i tok ol i witnesim ol pikinini i kisim konfamesen i soim olsem nupela mak long laip bilong ol dispela pikinini.

Tasol ol papamama i gat wok yet long givim sapot long ol long kamap strong insait long bilip na wokabaut bilong ol olsem Kristen na karim diwai kros.

Maski traipela ren i pundaun ausait, ol manmeri i sindaun insait long sapel bilong Martin Luther Semineri i amamas long witnesim ol dispela baptisim na konfamesen.

Long olgeta yia, Oktoba 31 em Rifom Sande, de we fauna bilong Luteran Sios, Martin Luther, i toksave olsem em i lusim Katolik na kamapim sios bilong em yet.

Klinim ples bilong Prins long kam

Nicky Bernard i raitim

DIGICEL PNG i kamapim wanpela gutpela kempen long klinim ples bipo long Prins Charles na meri bilong Camilla kam kamap long Pot Mosbi.

Long Fraide wik i go pinis, Digicel PNG askim ol manmeri na pikinini long klinim ples we Prins Charles na meri bilong bai ron long en.

Planti lain husat i harim dispela toksave bin go kamap long ples ol makim na kisim wanwan tisot, kep na plasti bek na kisim ol pipia long sait bilong rot.

Dispela ol lain klinim ples tu bin laki long kisim K50 kredit long mobail fon bilong ol. Digicel PNG i kamap long dispela tingting long wanem planti pipia save stap long sait bilong rot, olsem na ol kamap dispela tingting long klinim ples bipo long Prins na meri bilong kam raun long Pot Mosbi.

Dispela ting bilong Digicel mekim na ol sait rot bilong Mosbi bin klin stret na dispela i no bagarapim nem bilong yumi na givim soa long ai bilong Prins Charles na meri bilong em taim tupela ron long kar.

Mosbi Siti bin klin stret long dispela tripela de raun bilong tupela marit taim tupela stap long bikipela siti bilong yumi.



KLINIM FRAN BILONG BOROKO FOODWORLD: Ol manmeri na pikinini husat i givim nem long Digicel i klinim sait bilong rot na baret long Boroko Foodworld. Poto Nicky Bernard.

Ol rais fama i selebret long nupela rais masin bilong ol

Mathew Yakai i raitim

OL pipel bilong Dagup eria long Wod 6 insait long Saidor Lokol Level Gavman (LLG) long Rai Kos Distrik, Madang Provins nau i gat nupela masin bilong rausim skin bilong rais na tok tenkyu i go long Raymond Beda na pikinini bilong em, Auki Beda.

Long Sarere Oktoba 27, ol i bin lonsim nupela rais mil insait liklik seremoni we olgeta asples lida na mausman bilong Saidor LLG, na Madang Provinsal Gavman long Umbodi eria bin stap.

Auki Beda em i wanpela gutpela rais fama insait long eria na long hatwok bilong em yet em bin statim bisnis wantaim K5, 000 helpim bilong JICA.

Wod 6 eria i gat 49 rais fama na ol model fama husat kamapim bikipela mak bilong lokol rais husat bai benefit long nupela mil.

Taim em i stori, Auki i tok em no bin laik baim rais mil wantaim poket mani bilong em yet, tasol bihain em bin luksave long laik bilong planti asples fama long

growim rais.

"Mi sevim mani mi bin kisim long salim vanilla, kakau na kopra na liklik stoa bilong mi yet, na baim dispela long sevim ol asples rais fama.

"Ol i save go longwe long Saidor o Wap long milim o klinim rais bilong ol na em i longpela tumas. Planti ol i lusim pinis bikos long nogat gutpela rmasin bilong klinim rais, na mi tingting long baim wanpela mil na em i ken mekim isi long klinim ol prodak bilong ol," Auki tok.

Rai Kos eria na Saidor LLG i bin stat long planim rais bipo yet long 50s. Na Beda famili i bin stap strong wantaim na planim bihain long ol i planim kakau, kopra na vanilla.

"Bihain long 20 yia, mi laikim bikipela rais mil bilong ol lokol fama bilong mi na ol i noken baim rais long ol bikipela stoa," Auki tok.

"Taim mi liklik mangki yet, mi lukim papa bilong mi i kaim rais go long Saidor long mil. Em i bikipela hatwok na mi no laik lukim ol narapela fama i wokim olsem gen.

"Mi baim dispela masin long sapotim Ward 5, 6, 7

na 4 na ol manmeri long Saidor i ken growim moa rais," Auki tok.

Opisa bilong Komes na Turisim Dipatmen, Lenneth Roth, wantaim Madang Provinsal Gavman i bin opiseli lonsim nupela rais mil na givim tok sapot long pipel long growim moa rais na sanap strong.

"Putim God pastaim insait long olgeta wok yupela i mekim, na Em bai blesim wok bilong yupela. Putim pastaim edukesen na God insait long laip bilong yupela na God i ken blesim yupela moa," Mis Roth tok.

Em tokim pipel olsem kain hap ol i stap long en i no kisim inap sevis, tasol ol i noken stopim wanem samting ol mekimOl i mas go het na wokim long kisim moa gutpela kaikai.

"Noken tingim olsem gavman bai wokim samtig long yupela bikos em bai ino nap kamap olsem bikos mipela bin lukim pinis," em tok.

Rural Developmen Opisa bilong Saidor LLG, David Lopez, i tok olsem tok lukaut bilong kaikai em i antap tru long Nesenel Gavman aninit long Nesenel Gols – Visen 2050,

na tu, aninit long Madang Provinsal Kalibobo Visen, na tokim pipel long groim moa rais.

Em tok gavman i gat plen long helpim manmeri husat i holim liklik blok long go insait long liklik bisnis, na givim tok sapot long ol rais fama long investim moa eneji na mani insait long groim rais.

Lopez i tok long 1950, i bin gat 400 ol rais fama insait long Saidor tasol nau, mak i go daun long 200. Dispela em bikos long nogat gutpela trenspot na rais mil masin.

"Stopim pasin bilong givim kes na nau stat bilong Auki em i we bilong strongim yumi yet," Lopez tok.

Em laikim ol asples lain long stap insait long wok bilong groim rais long mekim namba bilong ol rais fama i go antap na ol ken isi long askim sapot bilong ol bos lain husat i holim pawa.

Olgeta fama na lida tu wanbel long Auki na famili bilong em long nupela rais mil masin, na askim husat em i no groimrais long tat planim rais bilong ol nau.



LONSIM NUPELA KLINIM RAIS MASIN: Lenneth Roth i katim riben long lonsim nupela rais mil masin taim wanpela bikman i lukluk i stap. Poto: Mathew Yakai

Raun Lukim Ol Meri na Pikinini



Prins Charles na meri bilong em Dasis Camilla i toktok wantaim ol meri bilong ples Boera, Sentrel Provins. Poto: Nicky Bernard



Yut, Meri na Famili wantaim Lorraine Siraba

Monitaim ol piksa nogut long Fesbuk

OL PNG atoriti i mas hariap long glasim na mekim samting long pasin bilong tilim, kism na lukim ol piksa nogut na ol narapela nogut samting long sosel network, Fesbuk.

Ol yangpela pipel long PNG i wok long kism nating na tilim i go long wanpela narapela ol piksa nogut, ol piksa long ol as nating manmeri na ol kain olsem aninit long nus bilong ol loman. Samting bilong wari long dispela em, ol lain i yusim Fesbuk i serim ol piksa na em i fri long salim i go aut long moa poroman wantaim nogat wari samting olsem samting ol i wokim i stretpela o nogat. Ol i hariap long salim taim ol poroman i klikim "like button".

Taim ol narapela kantri long wol i wok long strongim intanet sekyuriti bilong ol, PNG i no mekim wanpela samting yet long sait bilong (cyber) saiba bilding na ol narapela eria bilong yusim intanet long en.

pipel i kism intanet long ol mobail fon, i gat bikpela sans long ol yangpela pipel i yusim nogut intanet. Stat yet long taim intanet na ol sosel network na ol mobail fon (olsem ol liklik kompyuta) i kam insait long dispela kantri, yumi wok long lukim bikpela senis long rot we "modern technology" o ol nupela masin bilong salim toktok i go na i kam long wanpela narapela i wok. Ol redio na TV i isi long kontrolim na i gat rot we ol atoriti i ken glasim na putim tambu long sampela ol progrem na ol piksa ol i lukim i no gutpela long ol pikinini. Nau yumi stap long kain taim we ol lain i save kamapim midia onlain i kamapim moa ol samting. i mas gat eduken awenes long kamap ol gutpela dijital manmeri long helpim ol pikinini i stap seif onlain.

Dijital midia i kamap pinis na bai stap long senisim ol laip, pasin na komyunikesen na em i bikpela samting ol papamama i eduketim ol yet long rot we ol pikinini bilong ol i wok long yusim intanet na monitaim ol pes we ol i wok long lukim long en. Ol telekomyunikesen kampani, ol ejensi i lukautim loa na ol stekholda i mas bung na toktok long mekim samting i kamap. Gavman na indastri i mas mekim samting long lukaitim ol pikinini na ol yangpela pipel long ol nogut samting. Long dispela taim, ol famili i no save long kism helpim long wanem hap sapos ol i laik putim tambu o banis long ol pesenel kompyuta, ol mobail fon o ol gem ol i save kism long intanet long en. Yumi noken wet inap hevi i kamap na traim long stretim. Yumi mas mekim samting nau. Taim yumi no mekim samting long stretim samting i no stret, yumi no helpim, tasol yumi wok long kontribut long samting i no stret long nupela jeneresen bilong yumi.

Raun Lukim Ol Meri na Pikinini:



Dases ov Konwol Camilla i raun lukim ol meri na pikinini meri long Se John Guise Stadium. Poto: Nicky Bernard



NOTIS IGO LONG OL SAPLAIA BLONG OL GUDS NA SEVES IGO LONG GAVMAN DIPATMENT, PROVINSOL NA LOKOL LEVOL GAVMAN

2012 PASIM BLONG OL AKAUNTS

TOKSAVE LONG ARERE BILONG 2012 FAINESOL YIA IGO LONG PABLIK OLSEM:

- Laspela dei long givim aut ol niupela Integrated Local Purchase Order Claim (ILPOCs), na tok orait long commitment igo long Gavman PGAS em long deit 10th DISEMBA 2012. Bai nogat niupela ILPOC bai go aut bihain long dispela dei, 10th DISEMBA 2012.
- Peimen bilong ol guds na seves igo long husat i givim ol samting long Gavman, yusim ol trupela ILPOC bai i go yet inap 31st DISEMBA, 2012.
- Gavman bai baim husait saplaia sapos yu givim ol invoices blong yu igo inap arere blong bisnis long dei 07th DISEMBA 2012. Sapos yu givim ol guds na seves pastaim long 07th DISEMBA 2012, bai ol baim yu long 2012 yia.
- Olgeta invoices na wanem kain askim yu gat imas go long pei opis blong wanwan gavman dipatmen husait ibin yusim guds na seves blong yu. No ken karim ol kleims bilong yu igo long Dipatmen bilong Fainens.
- Toksave ken olsem Gavman bai baim tasol ol opisil ILPOC na APC na ino ol narapela kain kleim. Dispela em i Lo.

Tok Orait i kam long:

STEVEN GIBSON
SEKETARI BLONG FAINENS
DEPARTMENT OF FINANCE

Haus Ruth amamas long Dases Camilla lukim ol

Veronica Hatutasi i raitim

HAUS Ruth long Ela Bis, Pot Mosbi i bin kam gut long Mande moning taim Dases bilong Konwol, Camilla, em meri bilong Prins Charles, namba wan pikinini bilong Kwin Elizabeth 2 bilong Inqlan na Komonwel, na namba 10 lapan o sif bilong Manus, i bin raun i go lukim ol woklain, bungim ol lain i stap long hap, toktok na sekan wantaim ol.

Haus Ruth em dispela haus we i save helpim lukautim ol mama na ol pikinini we i kisim hevi long domestik vailens o ol papa i paitim na bagarapim ol na ol i painim seif ples long go stap long en.

Leit Ruth Mary George em meri bilong Larry George, husat i bin statim City Mission long helpim ol turangu yangpela mangki i nogat ples long stap long en na i raun nabaut long strit na wokim trabel, i bin statim Haus Ruth long 1993 long helpim ol mama na pikinini i stap long hevi bilong domestik vailens.

Nau Haus Ruth i gat ol rum we ol meri na pikinini i stap long hevi i ken go stap, slip, na kaikai long en na tu, kisim kaunseling na ligel helpim long ol woklain long hap.

Long helpim ol wok i go het long senta, Haus Ruth i gat ol rum we ol yangpela wokmeri i save rentim.

Ol wok manmeri bilong Haus Ruth na City Mission i bin gat gutpela sans stret long lukim, toktok na sekan wantaim Dases Camilla na Lynda Babao em meri bilong Praim Minista Peter O'Neill.

Tupela bikmeri i bin gat

sans long kisim save long ol gutpela wok we dispela senta i mekim long helpim ol lain i laikim helpim taim ol bin bung wantaim ol woklain bilong hap.

Bihain long bung, Ms Babao i bin prisenim wanpela kopa biting freim i gat long em piksa bilong mama na pikinini i go long Dases Camilla olsem wanpela memori long wokabaut bilong em i kam long PNG.

"Mipela i amamas stret long Dases bilong Konwol i kam raun lukim mipela hia long wanem, em i ken givim sans long gavman i ken luksave long wok mipela i mekim na givim sampela helpim.

"Mipela i no save kisim wanpela helpim i kam long gavman. Meri bilong praim minista tu i stap na mi bilip olsem em i ken putim sampela gutpela toktok long senta i go long gavman," Menesa bilong senta, Monica Richards, i tok.

Ms Richards i tok planti lain i save go long senta long kisim helpim na long dispela Mande, 18-pela meri na 6-pela pikinini i bin stap long senta na kisim helpim i stap.

Ol woklain na ol sekyuriti gad bilong ol i bin lain ausait long senta na taim Dases bilong Konwol na Ms Babao i laik go aut, Dases i bin gat sans long toktok na sekan wantaim ol lain we i mekim ol i amamas nogut tru long bungim stret na seklanim wanpela Royel famili memba we yumi save lukim tasol long TV, harim nem bilong ol i pairap long redio na ritim ol stori bilong ol long ol niuspepa na megesin.

Woksop glasim ol meri na ileksen ... Wok redi mas kamap tripela yia pastaim

WOK redi long ileksen i mas kamap tripela yia pastaim long ileksen taim, wanpela woksop i glasim 2012 nesenel ileksen na ol meri i sanap we, i bin harim.

Samting olsem 30 meri i bin sanap na resis long 2012 nesenel ileksen i bin kamap long mun Jun bilong dispela yia i harim.

UN Wimen i bin go pas long givim trenin g wantaim helpim bilong Yunivesiti bilong PNG, N esenel Risets Institut

na Opis bilong Developmen.

Woksop i bin kamap long Mas Gels Risot long ples Gaire long las wik. Yunaited Nesens Wimen (UNW) i bin go pas long dispela woksop.

Woksop i bin painimaut olsem ol meri husat i laik resis i mas wokim na redim ol ples bilong ol tu na tripela yia pastaim ileksen i kamap na moa pipel i ken save long ol.

Woksop i bin lukim olsem wantaim ol wok redi i kamap tripela yia pastaim, i mas gat

gutpela fanding na tu, yusim midia long mekim wok poromosen na awenes bilong ol, manl makim Yunaited Nesens meri long PNG, Jeffrey Buchanan, i tok.

Em bin tok woksop i luksave olsem ol plen bilong wok kempen i mas stat tu o tripela yia pastaim lon g kendidet piriet.

Em bin tok planti meri i tok olsem bikos ol i no mekim ol wok redi pastaim na tu, ol i no gat gutpela toktok wantaim

midia, ol i no bin mekim gut. Sekyuriti na fanding tu em ol narapela samting i kontribuit long ol i no mekim gut long ileksen.

Ol bin holim woksop lon g ol meri i bin resis long 2012 Nesenel Ileksen, ol developmen patna olsem Opis bilong Developmen, Yunaitet Nesens Developmen Program na ol narapela gavman ejensi long ol i ken luksave wanem samting i bin kamap long ol meri kendidet long dispela ileksen.

Papua New Guinea Business Coalition Against HIV & AIDS - BAHA

World AIDS Day - Dec 1 2012 - BAHA WEAR RED

REMINDER

World AIDS Day December 1st, 2012
To show your support register now and join
BAHA to WEAR RED or HANG RED
on Friday Nov 30th (in lieu of December 1st)

Fill-in the registration form below with your official Organisation Name, Contact Person, Contact details (phone & email), location and send to BAHA_enquiries@baha.com.pg.

World AIDS Day 2012 REGISTER to Wear/Hang Red on Friday November 30 REGISTRATION FORM

Participating Organisation - Name: _____
Contact Person - Name: _____
Contact details: _____
Location: _____
Email: _____

Email to Joan Kim enquiries@baha.com.pg or Fax: 323 5596 Call free-line 7200 2242 for more information.

Participating organizations will have their name or logo appear in a 2 page advert promoting Wear Red WAD 2012 on Friday 7th December.

DEADLINE for LOGOS and names of participating organizations 4pm Friday 9 November

If you cannot see the photos in this Toksave Email, then email Joan Kim for a PDF copy.
Companies can Hang their Ribbons one week before December 1st 2012



ROYAL PRESEN: Madam Lynda BABAD, meri bilong Praim Minista Peter O'Neill i prisenim Kopa biting gif i gat mama na pikinini i go long Dases bilong Konwol, Camilla, meri bilong Prins Charles, taim em i lukluk raun HAUS Ruth. **Poto: PM's Midia**

Raskol kilim MTC fainol yia Bogenvil sumatin

James Kila i raitim

MADANG Tisa Koles (MTC) stat long las wik Tunde nait i kam inap long dispela wik i stap wantaim bikipela sore na wari bihain long dai bilong wanpela sumatin husat sampela lain i sutim em wantaim naip na em i dai.

Ripot i tok olsem sumatin ya Hillary Taule, husat i mekim namba 4 yia long stadi bilong em long MTC i bin go aut wantaim sampela ol pren taim sampela raskol lain i sutim em long wanpela bainat long samting olsem 8-kilok long Tunde nait las wik.

Hillary i bin bihainim sampela sumatin pren bilong em i go aut long geit taim dis-

pela birua i bungim em.

Polis ripot i tokaut olsem polis i holim pasim pinis 9-pela saspek, o lain ol i ting i save long dai bilong dispela sumatin. Ol dispela lain polis i kisim ol long wanpela setelmen klostu long Mis viles long Sagalau eria.

Long Fraide moning, ol sumatin bilong MTC i mekim wanpela wokabaut stat long Nu Taun stat long Lae Bildas i go daun long Madang taun long soim bel-hevi bilong ol long dispela hevi i kamap na tu mekim wokaton long bungim sampela mani long helpim long salim bodi bilong dispela sumatin i go bek long ples bilong em.

Turangu dispela sumatin em planti ol wan skul bilong em i stori olsem em wanpela

smatpela long skul wok bilong em. Ol leksera long skul i save putim ai long dispela sumatin na i luk olsem em bai wanpela long ol top sumatin long taim bilong greduesen long pinis bilong dispela mun. Tasol sore tru, turangu i lusim laip bilong em long han bilong ol raskol lain.

Long Fraide, taim ol sumatin i mekim wokabaut o mas raunim taun, ol i tokaut long bel-hevi bilong ol tu lo na oda hevi nau i wok long kamap bikipela long Madang na planti sumatin i no moa filim seif.

Planti ol dispela hevi we i save kamap long ol sumatin em ol yangpela lain bilong ol setelmen husat i save dring 'yawa' i hombru na smuk

mariwana i save kamapim. Ol dispela lain long setelmen i save jeles taim ol i lukim ol sumatin i wokabaut raun.

Long dispela wokabaut mas bilong ol MTC sumatin, ol i raitim tu long pepa na soim olsem ol i no amamas long wanpela nius-meri bilong *The National* niuspepa, husat i putim wansait ripot we i no givim stret stori long birua i kamap. Dispela ripot i giaman tasol na i no stret.

Dai bilong turangu Hillary i bringim bikipela sore na wari stret long ol frens na ol wan skul bilong em long MTC. Ol sumatin long MTC i go insait long wan wan rijinol grup bilong ol na givim sapot i go long haus-krai bilong leit Hillary.



Dispela 4-pela sumatin bilong Madang Tisa Koles i sore na penim graun long ol yet na karim poto i soim piksa bilong sumatin ol raskol lain i kilim long las wik Tunde. *Poto: James Kila*



DAKS SUMATIN: BENK bilong Saut Pasifik (BSP) i amamas long sapotim ol skul insait long kantri wantaim ol sponsasip awot long ol sumatin i wokim gut tru long akademik eria, na em i ken helpim ol i mekim gut long skul bilong ol. Long dispela wik, BSP i bin prisenim Gret 12 daks awot i go long sumatin meri i wokim gut stret na kisim ol top mak, Dora Buki. Hia em Koporet Sponsasip Menesa, Rosemary Mawe, i prisenim gif pek na K200 vausa em bai opim akaun bilong em wantaim BSP Benk. *Poto: BSP Pablik Rilesens*

Vanimo Haus sik kisim klostu long K8 milian helpim

VANIMO Haus Sik long Sandaun Provins bai givim gut ol helt kea sevis long ol pipel wantaim nupela tupela stori edministresen bilding i sanap long K7.8 milian manimak helpim Australia i givim long en.

Aninit long Insentiv Fan, Australia ibin givim K7.8 milian long sanapim tupela stori edministretiv bilding, 36 rum em ol haus slip bilong ol meri, 12-pela yunit bilong slip na sosel sapot sevis bilding bilong Vanimo Haus sik.

Deputi Sekreteri bilong Helt, Dokta Paison, i tok amamas long Australia i patna wantaim PNG long kamapim dispela nupela edministretiv bilding.

Dokta Dakulala i makim gavman bilong PNG na autim bikipela tok tenkyu i go long Australia long skruim PNG Australia patnasip long developmen bilong em (PNG).

Em i tok dispela wok patnasip i kamap long ples klia long PNG Insentiv fan program we i kamap olsem wanpela gutpela program dona i fandim long PNG na i wok gut.

Em i tok dispela program i bin sanapim ol bris, ol rot, ol taun maket, ol skul na ol helt bilding.

Hetman bilong AusAID long PNG, Stuart Schaefer i tok bikos long dispela nupela na gutpela moa bilding, moa meri bai laik skul na wok long helt sekta taim ol klinikel sevis bai kamap gut bikos long ol wok impruvmen long haus sik.

Em i tok tu olsem bai mak

bilong ol mama i karim pikinini i kamap gut bikos long gutpela bilding na ol sevis em bai givim long en.

Dispela nupela edministretiv bilding bai gat dentel na eksrei sevis, konprens rum long graun plua wantaim sinia menesmen tim, humen risos, akauns na infomesen teknoloji long to plua.

Long strongim wok edministresen na menesmen bilong haus sik, ol i sanapim lokol eria netwok na peirol sistem i kam aninit long kompyuta sistem.

Sif Eksekutyutiv opisa bilong Vanimo Jenerel Haus sik, Elias Kapavore i tok planti pipel i save stap ausait long ol taun na siti na aggremit dispela haus sik em i bikipela samting long givim helt sevis na kisim ol manmeri i go wok long provins.

Em i tok haus sik nau i gat 13-pela medikel opisa na ol i wok long sejeri, intenel marasin na helt bilong ol mama na ol pikinini.

Em i tok dispela i kamap bikos long nupela edministresen bilding.

PNG Australia Insentiv fan i save givim luksave long ol haus sik olsem Vanimo Jenerel Haus sik we i mekim gut wok stret na kontribut gut long ol wok developmen bilong dispela kantri.

Long sampela yia i go pinis, dispela haus sik i bin kisim helpim long PNG Insentiv Fan long apgretim wing bilong ol mama i karim na ol pikinini, ol STI na masin long kukim ol pipia we ol dokta na nes i save operetim ol man na yusim.

Bom Elementeri skul kisim kol bilong nambis

James Kila i raitim

SAPOS yu wanpela nupela man o meri i go olsem long Bom viles long Astrolabe Be LLG long Raikos distrik long Madang provins, bai yu mangal stret long lukim ol elementeri skul sumatin i sindaun gut tru aninit long bikipela diwai arere long nambis wantaim tisa bilong ol na skul i stap.

Naispela kol win bilong solwara save blo i kam na ol bai sindaun gut tru long greipela wesana arere long nambis na skul i stap. Wanpela bikipela diwai bilong nambis ol Madang i save kolim "Kalapuling" i givim gutpela seid na i pasim san na ol sumatin i save sindaun gut tru na harim tisa i givim skul long ol.

Ol sumatin ya i save sindaun na lukluk i go not olsem long Godawan Poin

na tu ol ailan bilong Bilibil na Yabob. Godawan Poin em we Kalibobo i sanap long en na tu Madang taun i stap long hap.

Dispela naispela skul long Bom ples i soim olsem ol sumatin i nidim sampela helpim long edukesen dipatmen long Madang provins long wokim kamap nupela klasrum bilong ol. Tasol nau yet, ol sumatin i save skul insait long wanpela haus-morota klasrum arere long ples long Bom.

Taim ples i hot, ol i save go autsait na sindaun long nambis na kisim insait na kisim tu naispela kol win em Papa God i salim long mekim skin bilong ol i pil fres na ol i ken lainim planti nupela samting.

Wanpela komyuniti lida long Bom, William Wageng i tok ating ol LLG kaunsila bilong Astrolabe Be i mas lukluk na traim helpim dispela elementeri skul long Bom.

Kwin i gat pasin bilong laikim na luksave long pipel

Veronica Hatutasi i raitim

LAS WIK Sande Novemba 3 i bin lukim Se John Guise Stadium i pulap kapsait wantaim pipel husat i bin stap insait long wanpela sios sevis wantaim Prins Charles na misis bilong em, Dases bilong Konwol, Camilla Parker.

Prins Charles wantaim meri bilong em i bin kam lukluk raun long PNG olsem hap long 60 yia daimon jubili selebresen long Kwin Elizabeth 2, mama bilong em, i stap olsem Kwin bilong Ingran na Komonwel long mak bilong 60 yia.

Lotu sevis i bin wanpela eku-menikel bung we ol sios lida bilong ol wan wan bikpela sios long kantri olsem Angliken, Katolik, Luteran, Yunaited, Seven De Edventis, Baptis na Pentekostel i bin stap insait long en.

Bikpela toktok i bin kamap long taim bilong serim Tok bilong God long dispela taim em laik pasin long God na long ol neiba o narapela manmeri.

Pater bilong Angliken Sios husat i bin go pas long lotu pastaim i bin tok welkam long Prins Charles na misis bilong em Dases Camilla long stap wantaim pipel bilong PNG long



RAUN KAM: Prins Charles na meri bilong em Camilla Parker, Dases bilong Konwol long Se John Guise stadium long Sande laswik. *Poto Nicky Bernard*

selebretim Daimon Jubili o 60 yia bilong Kwin i bosim haus bilong em, kantri Ingran na ol Komonwel kantri long wol.

"Gutpela de tude yumi bung long selebretim daimon Jubili bilong Kwin na PNG olsem wanpela Kristen kantri i luksave long dispela de na selebret.

"Tupela bikpela mandato i winim ol narapela em, laikim God wantaim olgeta leva, tingting na laik na tu, laikim narapela olsem yu laikim yu yet, na yumi noken tok giaman.

"He Majesti Kwin Elizabeth 2 i

bin mekim gutpela wok long 60 krismas na em bin soim laik bilong em long pipel insait long ol Komonwel kantri we PNG i wanpela long ol," Pater ya i tok.

Taim Praim Minista, Peter O'Neill i tok welkam long Prins Charles na meri bilong em Camilla, em bin tok stat yet long Kwin Elizabeth i bosim ol 54 Komonwel kantri, ol i go bikpela na ol i gat ol narakain kalsa na rot bilong mekim samting. Tasol lidasip bilong Kwin Elizabeth 2 i gat luksave long ol wanpela narapela, yuniti, stap gut na gavman i gat

bel isi i stap.

Em bin tok long yangpela bilong em yet, Prins Charles i save sapotim gut na makim mama bilong em.

Bikos dispela em i namba 4 taim bilong Prins Charles long kam long PNG, Mista O'Neill i tok PNG i yangpela kantri i wok long groa yet, i gat planti naturel risos, tasol em i gat ol salens long stretim yet.

Prins Charles i bin wokim toktok na tok tenkyu long gutpela welkam ol pipel long Mosbi i givim em long ples balus na olgeta hap em na meri na lain bilong em i bin go long en.

Em i bin tingim ol memori long namba wan taim em bin kam long PNG 50 krismas i go pinis.

"Mi no lusim tingting wok-about, sindaun na stap bilong mi long hia. Mi bin lainim olsem kalsa i bikpela samting na in ap tude, tingting long kalsa bilong PNG i no lusim ni," Prins Charles i tok.

Musik bilong kwaia bilong Haia Visen na ol Royel PNG Ailan Rejimen i bin krai na pairap gut tru long mekim dispela sios sevis i wanpela gutpela stret.

Nupela buk baibel long tok ples Bahinemo

WANPELA selebresen i bin kamap long ples Inaru long Is Sepik Provins taim ol Bahinemo Tokples pipel i bin kisim ol nupela Nu Testamen Buk Baibel we ol i tanim long tokples bilong ol.

Nu Traibs Misin (NTM) em wanpela sios i stap na wok long 25 krismas yia nau wantaim ol Bahinemo pipel i bin givim 3,000 Tok Pisin i go long pipel insait long dispela selebresen ol bin holim long plews Inaru.

Long 25 yia nau NTM i wok na stap long hap, planti gutpela developmen samting i kamap long pipel na ples bilong ol.

Long yia 1987, tripela NTM misinari i bin go sindaun long Bahinemo long skruim wok bilong skulim pipel long Buk Baibel, tanim Buk Baibel, literesi trening skul. Nau, ol pipel bilong Bahinemo i ken rit na rait long tokples bilong ol yet. Ol NTM misinari i trenim tu ol asples manmeri long besik mets na helt kea long ol Bahinemo pipel na trenim ol tu long kamap ol literesi tisa, Viles Helt Volantia, aninit long Misin sponsasip bilong ol.

Tu, ol NTM i wok wantaim ol Bahinemo pipel long bildim ples balus na dispela i wok i stap yet long dispela taim. Ol i skulim tu ol pipel long lukautim ples balus na ol i ken yusim yet long bihain taim.

Wok long tanim Nupela Testamen i go long Tokples



TOKPLES BUK BAIBEL: Jay Franicevich i holim wanpela long ol nupela Buk ol i tanim i go long tokples Bahinemo. *Poto: SIL PNG*

Bahinemo i bin kisim 12-pela yia olgeta. Dispela em bikos ol misinari i mas lainim tok ples pastaim na save gut long helpim ol i mekim wok tanim i go long tokples.

Ol pipel tu i bin givim taim na ol risos long wok wantaim ol misinari na helpim long ol wok stadi, stretim ol wok bilong tanim tok i gutpela na pipel i ken ritim.

Jason Steward i bin koinim misinari tim na go stap long ples Inaru long yia 1997.

Bihain long tripela krismas, em bin stadim tokples na kalsa bilong ol Bahinemo pipel i bin wok long tanim Buk Baibel i go long tokples bilong ol

Bahinemo pipel.

Em i tok dispela wok i bin kamap gut bikos gutpela wok bung namel long ol pipel na misinari i stap.

Jason i bin tilim ol 3,000 nupela Testamen Baibel ol i tanim i go long ol sios pasto na ol elda o bikman bilong Bahinemo sios na komyuniit.

Sally Dye na man bilong em, Wayne i save tanim Buk Baibel wantaim Sama Institut bilong Linguistiks (SIL) i wok wnataim ol Bahinemo pipel long ples Wagu, stat long yia 1964 inap long yia 1985.

Tupela i bin tanim ol Nu Testamen Buk olsem, Ol Wok bilong ol Aposel, ol narapela long

olpela na Nupela Testamen na o, i helpim tu long mekim ol narapela wok long sait bilong antropoloji, kalsa na lainim.

Ol i kontribut i go long SIL-PNG long sait bilong antropoloji na lainim kalsa.

Jay Franicevich i wanpela NTM misinari i wok i stap long Bahinemo long yia 1990 yet i tok strong bilong ol pipel yet long gat buk Baibel long tokples yet bilong ol i mekim samting i kamap tru.

Em i skelim dispela wantaim kaikai stret bilong ol long olgeta de.

"Dispela tok em olsem saksak bilong yumi. Sapos yu nogat saksak, wanem samting bai kamap? Bai yu hangere nogut tru na bai yu dai. Tasol nau yumi gat dispela saksak. Em i saksak bilong Papa God i salim i kam. i no strongim bodi bilong yumi tasol. Em i strongim olgeta samting bilong yumi—em i strongim tingting bilong yumi, lewa bilong yumi, spirit bilong yumi, olgeta samting. Nau yumi mas kaikai dispela samting strong," Jay i bin tok.

NTM i tok tenkyu i go long gavman bilong PNG long larim ol i stap na wok wantaim ol pipel bilong Bahinemo long pinisim ol wok tanim long Nupela Testamen na givim skul bilong Baibel, literesi trening naples balus sevis i go long ol Bahinemo pipel long Is Sepik Provins.



LAIKIM GOD

Mi bin postim o salim dispela stori long Facebook bilong mi long Bahasa Indonesia. Long Sande 4 Novemba 2012, 20-pela pikinini i bin selebretim namba wan Komyunio long Sen Michael Peris Hanuabada. Mi yusim dispela stori long homili bilong mi.

Tupela man, Michael na Gregory, i wok-about long Sahara ples nating (Sahara Desert). I nogat wanpela samting long staim ol. Olsem na ol i no save, wanem hap em i Is, wanem hap em i Wes o Saut o Not. Ol i lus olgeta. Hangre i bin kilim ol nogut tru. Kaikai na wara i pinis. Long ples nating, i nogat wanpela diwai o wanpela hul wara.

Bihain long 4-pela wik i go pinis, ol i kamap wik o nogat strong olgeta. Kirap long moning ol i wokabout. Taim ol i bungim tudak, ol i slip tasol. San i kilim ol long de. Long nait, kol i kilim ol. Tupela i karim bikpela hevi tru.

Long de namba 39, ol i kisim blesing. Bikos long bikpela san tru, klostu long 12 klok, ol i harim krai bilong Adzan. Em i krai i save kamap long Mosque long singatim ol manmeri long prea.

Taim ol i harim krai bilong Adzan, tupela i lukluk i go long hap krai i kamap long en. Ol i lukim olsem sampela grin lip bilong diwai i stap long hap. Hariap tupela i wokabout i go long dispela krai na grin lip bilong diwai. Taim ol i kamap klostu liklik, ol i lukim diwai bilong palm na narapela diwai i grow long hap. Taim ol i kamap klostu liklik moa, ol i lukim tower bilong Mosque/haus lotu bilong ol Muslim.

Tupela i amamas na tok tenkyu long God. Michael i tokim Gregory olsem. "Poro, nau yumi bai kamap long ples na haus bilong ol Muslim. Yumi laik bai ol i mas welkamim yumi na givim kaikai na wara long yumi. Tasol, yumi tupela i Kristen. Mi prèt, nogut ol i no givim kaikai long yumi. Olsem na, moa-beta yumi mas senisim nem, yusim nem bilong ol Muslim. Mi laik bai yu kolim mi Mohammed. Noken kolim mi Michael moa".

Tasol Gregory i tok. "Em i gutpela tingting, tasol mi no laik senisim nem bilong mi. Nem bilong mi Gregory. Noken givim narapela nem bilong Muslim long mi."

Taim Michael i harim poro bilong em i no laik senisim nem em i tok; "Sori Poro. Ol i bai helpim mi tasol ya".

Tupela i kam na kamap long Mosque. Imam (Pastor bilong Muslim) i lukim tupela na i go bungim tupela na welkamim tupela i kam long haus bilong em. Taim ol i kamap long fron bilong haus, na sindaun aninit long diwai, Imam i tokim tupela; "Mi save yutupela i pilim taired na hangere stret. Tasol bipo mi sevim wara na kaikai long yutupela, mi laik save nem bilong yutupela pastaim.

Michael, husat i bin senisim nem bilong em i tokim Imam: "Nem bilong mi Mohammed". Imam i nodim het bilong em, na sekan wantaim Mohammed. Bihain em i askim Gregory; "Wanem nem bilong yu?". Gregory i tok: "Nem bilong mi Gregory. Tasol yu ken kolim mi Greg".

Imam i amamas na tok welkam gen long tupela. Bihain em i singautim haus meid bilong em; "Siti (nem bilong haus meid), bringim wanpela plet bilong kaikai na wara long jar i kam na givim long Gregory long kaikai".

Imam i tanim na lukluk long Michael husat i bin senisim nem bilong em Mohammed; "Mohammed, mi hop yu tingim yet. Nau yumi Muslim long olgeta hap bilong graun i stap long mun bilong Ramadhan. Yumi fasting (tambu long kaikai)"

Olsem na, soim LAIK bilong yu long God long olgeta taim, long olgeta hap yu stap long em. Noken pet o tok giaman. Tok giaman i no save bringim bel isi na amamas. Tok giaman i save bagarapim laip bilong yumi na laip bilong narapela.

Morobe Provinsal Gavman bai givim 10 pesen taitis long sios

Pasto Max Gende i raitim

GAVANA bilong Morobe, Kelly Naru, i tokaut na tok klia olsem aninit long lidasip bilong en, Morobe provinsal gavman bai stat givim 10 pesen taitis long baset bilong en olgeta yia.

Dispela mani bai go long strongim wok bilong sios insait long provins.

Naru i tokaut long dispela senis i bin kamap insait long Provinsal Eksekutiv Kaunsol (PEC) long Mande long Tutumang Haus long Lae. Na long lukautim dispela senis na mekim wok wantaim olgeta sios long Morobe, Provinsal gavman nau i gat ministri na siaman bilong ol lotu o relijin. Dispela em wanpela long 16-pela ol ministri we i stap insait long provinsal eksekutiv kaunsol.

Presiden bilong Wain-Erap Lokol Level Gavman (LLG), Charlie Foike, em i siaman na bai lukautim dispela nupela ministri

na wok bung wantaim ol sios.

Gavana Naru i tok, “Foike bai go pas long kamapim stia tok na polisi na mekim dispela ministri i helpim gut olgeta sios long Morobe.

Olsem ol sios inap helpim gavman long karimaut ol wok program long provins long wanem Morobe, em i wanpela bikpela provins, na gavman i nidim helpim bilong ol sios.

Ol sios bai stat long kisim mani helpim stat long 2013 baset o mani plen.”

Gavana Naru i tok tu olsem em i gat bikpela amamas long ol sios long wok bilong ol long provins. Em i tok, “Mi luksave na sapotim ol sios long wanem ples we gavman sevis i no inap long i go, em ol i stap na save sevisim ol pipel. Ol sios i save mekim bikpela wok bilong helpim manmeri long ples.”

Nau yet, ELC Yabim distrik Yut Kodineta na tu, memba bilong Morobe provinsalyut kaunsol,

Araba Saia, i tok em i amamas tru na sapotim disisen bilong Naru long givim na sapotim ol sios wantaim 10 pesen bilong provinsal baset olgeta yia.

Em i tok kain polisi em namba wan long kantri, tasol em bai gutpela ol arapela gavman long nesenel na provins tu inap mekim long gavman a sios i ken wokbung na helpim tru ol manmeri long ples. Araba i tok, “Opis bilong mi gat ol gutpela program, olsem Faiv Sta program bilong helpim ol yut long siti na ples. Helpim ol long gutpela sindaun na lusim pasin bilong bagarapim bodi bilong ol long kain kain rot.

Tasol bikpela hevi em long mani long sapotim dispela kain program long i go aut. Tasol nau gutpela tru Morobe provinsal gavman aninit long lidasipo bilong Kelly Naru, i laik helpim ol sios long 10% taitis.”



Araba Saia, Distrit Yut Kodineta.

Morobe PEC i gat senis

I GAT senis i kamap pinis long sais bilong Morobe Provinsal Eksekutiv Kaunsol – (PEC), nau i gat 16-pela memba tasol.

Aninit long bipo gavana, Luther Wenge, i bin gat 25 memba bilong PEC, dispela i abrusim mak we loa bilong Ogenik Loa long Provinsal na LLG gavjman (OLPLLG) i tok orait long en. Aninit long dispela loa, em i soim olsem Morobe bai gat tasol 16-pela memba long PEC na i no 25-pela memba.

Gavana Kelly Naru i tok aut long dispela wik Mande olsem PEC nau i gat 16-pela memba tasol bihainim loa i stap pinis na long helpim gut edministresen na karimaut gut ol polisi na disisen.

Ol nupela memba bilong Morobe PEC em:

- 1

Kelly Kasiga Naru, (Rijenal MP), Siaman bilong Fainens na Edministresen;
- 2

Sam Agi, (Ahi LLG Presiden), Siaman bilong Humen Risos Menesmen;
- 3

Joel Alu Johnson, (Siassi LLG Presiden), Siaman bilong Infrastraksa;
- 4

Morokoi Gaiwata, (Waria LLG Presiden), Siaman bilong Edukesen;
- 5

Charlie Foike, (Wain-Erap LLG Presiden), Siaman bilong Kristen Rilijen;
- 6

Judas Nalau, (Yabem-Mape LLG Presiden), Siaman bilong Lens na Fisikal Plen-ing;
- 7

Peter Namus, (Wampar LLG Presiden), Siaman bilong Loa na Oda;

- 8

Mitinec Kemung, (Kote LLG Presiden), Siaman bilong Agrikalsa, Laipstok na Fores;
- 9

Daniel Yengs, (Wapi LLG Presiden), Siaman bilong Helt na HIV&AIDS;
- 10

John Yawa, (Wau rurol LLG Presiden), Siaman bilong Komes na Indastri;
- 11

Daki Mao, (Umi-Atzera LLG Presiden), Siaman bilong Polisi Plening;
- 12

Michael Gape, (Morobe LLG Presiden), Siaman bilong Lokol Gavman;
- 13

Martin Jonah, (Nanima-Kariba LLG Presiden), Siaman bilong Komyuniti Developmen;
- 14

Seket Manasing, (Sialum LLG Presiden), Siaman bilong Fiseris na Marin Risos;
- 15

Jack Nawie, (Wau-Bulolo LLG Mayor), Siaman bilong sports, Kalsa na Turisim;
- 16

Kitowe Mumusiong, (Yus LLG Presiden), Siaman bilong Netseral Risos na Envairomen.

GavanaNaru i tok amamas na welkamim ol na tok klia olsem olgeta wanwan siaman bai gat opis bilong ol long ol i ken wok.

Em i tok ol nupela PEC memba i gat sikspela mun tasol long wok na bai go long ileksen long 2013.

Tasol em i tok, “Maski taim em i sot, mi bilip olsem ol nupela memba bai mekim gut wok bilong ol.”

Spot helpim long lukautim nambis eria

NAMBIS bilong Nesenel Kepital Distrik i wok long luk nais gen bihain long bikpela wok klinap ol 450 manmeri stap long Pot Mosbi bin wokim.

Ol dispela manmeri husait i wok strong aninit long hot san em long PNG etlets, ol skul sumatin na pikinini i wok wantaim wantaim long Just Play program, ol wokman bilong Esso Highlands, NCDC, Coca Cola, D.E.C., BSP na planti memba bilong pablik.

Olgeta i bin bungim o kolektim moa long 13,000lita (55 dram i pulap) o klostu tupela ton pipia long nambis.

Planti long ol pipia em ol plastik, ol dispela we ol i karamapim kaikai, ol ai bilong botol, ol plastic botol na bek.

Glas i narapela pipia ol bin bungim na dispela inap kamapim bikpela birua long ol lain i save go long nambis.

Ol plastik na ol atifisal pipia bai inonap sting na bai kamap birua long solwara. Bikpela namba long ol dispela em ol bin painim i tirip antap long biksolvawara na wasim i go long nambis long wol wantain PNG tu.

Planti taim, ol dispela pipia i stap long graun na ren i wasim na karim long ol baret i go long solwara, o win i save karim i go.

Sustainable Coastlines en i wanpela NGO bilong Nu Silan i helpim long ranim program ananit long flagship plen, “Love Your Coast” i traim long skulim pipel long dispela.

Ol i bin askim ol long wokbung wantaim PNG Spots Federesen na Olimpik Komiti aninit long Etletiks Komisin long sapotim kamapim Spot na Envairomen plen.

Ol bin wokim gutpela plen wantaim biksolvawara Nesenel Olimpik Komiti Etlet Komisin, na tingting long dispela kes stadi em ol narapela kantri long

Pasifik i ken bihainim.

Aninit long dispela wokbung, ol i givim trenim i go long ol spot manmeri wantaim save na aset bilong salim toksave i go long ol wanwan komyuniti long skulim ol long putim gut ol pipia, na wanem samting bai kamap sapos ol i no lukautim ol rabis gut.

Se John Dawanincura em i Presiden bilong PMGSFOC, husat tu i bin bungim ol pipia long dispela de i tok tenkyu long wok gut i bin kamap namel long PMGSFOC, Etlet Komisin, Spot na Envairomen Klinim ples na Nambis plen.

Taim em i toktok long gutpela bilong program, em bin tok, taim yumi wok long redi long 2015 Saut Pasifik Gems, dispela plen bai apim nem bilong spot na ol etlit ol bai makim kantri long en.

“Pot Mosbi siti bai lukautim 2015 Gems na mipela lakim em long luk gut taim ol narapela Pasifik ailan kantri i kam long nambis bilong yumi.

“I gat link long pilai spots na amamasim envairomen, na Nambis klinap em i gutpela we long soim dispela,” Se John i bin tok.

Na tu, em i salim tok amamas bilong PMGSOC i go long Esso Highlands, Coca Cola Amatil, NCDC, BSP na Steel Industries na Olimpik Solidarity long nambawan sapot ol bin givim long lukautim ol yet na ol envaornmen ol i raunim ol i stap.

Long taim wok bilong klinim pipia i pinis, ol man na meri na pikinini husat i bin long klining rabis long nambi tu i bin stap pilai insait long wanwan spot plen, wantaim nambis volibal, soka na basketbal tu.

Ol i bin inap long witnesim, lokal PNG atis na nesenel tim traitlete, Mairi Feeger, i yusim sampela rabis ol toromoi nating long wokim lol iklik art bilong yusim long 2015 Pasifik Gems logo.



	Air:
	K220.00
JAPAN	US\$110.00
PE	US\$150.00
	US\$210.00

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)

Tokelau i kamap
namba wan kantri
long wol long yusim
tasol sola pawa

AILAN Teritori bilong Tokelau i
winim ol arapela kantri raun long wol
long yusim san long mekim sola
pawa long lukautim olgeta pawa
saplai long kantri.

Dean Parchomchuck, dairekta
bilong kampani em i putim nupela
grid, POowersmart Solar, i tok ol
pipel bilong Tokelau i benefit tru long
dispela bikpela senis long disel i go
long sola pawa.

"Mipela i putim klostu wanpela
megawatt sola insait long 4000 sola
panel olgeta," em itok. Ol ailan i onim
namba tri na laspela hap bilong eneji
grid bilong en, las wik. Ol i bildim
wantaim halivim bilong \$7milian
grent i kam long Nu Silan.

Nupela sistem i seivim Tokelau
long baim disel we em i save peim \$1
milian long wanwan yia.

"Mipela i putim klostu wanpela
megawatt bilong sola, em i 4000 sola
panel olgeta," em i bin tok.

"I bin gat planti pawa kat taim
mipela i ron long ol disel jenereta,
nau sistem bilong ol i gutpela moa,
na ol i no save gat ol pawa kat moa."

Dispela bikpela senis tu i lukim ol
trening i go long o pipel long hau long
operetim na lukautim nupela sistem
tasol Powersmart Sola pipel bai go
het yet long sekim olgeta wok long
namel taim.

Mista Parchomchuck i tok i gat
pinis ol arapelal kantri bilong Pasifik i
soim bikpela laik long bihainm
Tokelau long sola pawa.

"I gat planti toktok na laik bilong
dispela," em i tok.

Fiji Konstitusen Komisin i tok em i no rong

FIJI Konstitusen Komisin i tok em i
no tru olsem vais presiden bipo i bin
bagarapim wok long wanpela pablik
miting.

Ratu Joni Madriwiwi nau i wok long
wok wantaim Komisen bilong painim
na kamapim ol tingting bilong ol pipel
long nupela mama loa em ol i bin wok
long lukluk long en long dispela
tripela mun i go pinis long olgeta hap
bilong Fiji.

Tasol gavman i sutim pinis ol
strongpela toktok agensim Ratu Joni
Madraiwiwi long bagarapim wok
bilong gavman taim em i bin tokaut
long tingting bilong en yet olsem Fiji
em i wanpela Kristen kantri.

Intarim Prait Minista, Frank
Bainimarama i autim pinis wanpela
toktok bilong en we em i tok em i no
stret nau long Ratu Joni long wok yet



Green Moon i winim 2012 Melbourne Cup

GREEN Moon, em Brett Prebble, husat i save stap long Hon Kong i bin stap long en i bin winim Melbon Kap.

Green Moon i bin hamarim ol narapela hos long Tunde, na winm siks-poin-tu milian dola Melbon Kap long Flemington.

Green Moon, husat i gat siks-pela krismas, i bin kisim trening aninit long Robert Hickmott na wanpela sempion joki, Brett Prebble, husat i bin kam long Hong Kong long raidim dispela hos.

wantaim Konstitusen Komisen.

Tasol siaman bilong Konstitusen Komisin,
Profesa Yash Ghai, i bin tok olsem Mista Joni i
no bin painim aut tingting en olsem Fiji em i
wanpela Kristen kantri.

Yash Ghai i tok tu olsem wanpela bikpela
wari em olsem gavman i tokaut pinis olsem bai
ol no nap toktok wantaim ol pipel long askim ol
long nupela mama loa em bai ol i autim long
mun bihain.

Narapela bikpela senis em gavman i bin
kamapim em olsem Konstitusen Komisen i no
gat strong o pawa long lukluk gut na senisim
sampela loa em bai no nap bihainim gut dis-
pela nupela draf mama loa.

Vanuatu PM Sato Kilman bai kamapim nupela gav- man

VANUATU Keteka Prait Minista, Sato
Kilman, i tok nainpela narapela politikal pati i
sapotim em long kamapim nupela gavman

bilong kantri.

Ol pipel bilong Vanuatu i bin vout long ilek-
sen long Tunde, long wik i go pinis, tasol ilek-
toral komisina i no tokaut yet long ol risal
bilong dispela ileksen.

Sato Kilman, i no toktok yet tu wantaim ol
wok nius, tasol wanpela tokman bilong pati i
bin toktok wantaim Vanuatu Brodcasting na
Televisen Koporesen na em i tokaut olsem em
i stret People's Progressive Pati bilong en i bin
kamapim pinis tok orait wantaim nainpela
narapela pati long kamapim nupela gavman.

Sampela long dispela tenpela pati, i gat
wanpela palamen memba tasol na planti long
ole m i bin memba bipo tu long ol kolisen pati.

Sapos ol dispela toktok bilong Mista Kilman
i stret grup bilong en bai winim hap long 52 ol
sia insait long palamen.

Palamen bai bung insait long tupela wik.

Salvesen Ami tok Nauru i no gutpela

SALVATION Army i tok asailam sika pros-

esing senta bilong Australia long Nauru i
kamapim ol helt hevi.

Salvesen Ami i gat wok bilong luksave na
glasim gut o pipel husat i soim ol sain bilong
distress o mental helt sik, na toksave long ol i
go long opisal helt provaida, Intanesenel Helt
na Medikal Sevises.

Meja Paul Maulds, Dairekta bilong em long
ol sosol progreem, i tok olsem ol kondisen long
Nauru ditensen senta i hot tumas.

Ol pipel i slip aninit long ol haus kandis. Ol
tent i save hat moa, na i tok dispela i tru.

Em i tok tu olsem ol wokmanmeri bilong
Salvation Army i stap aninit long ol wankain
tents na i no gutpela long stap insait long ol na
i hat. Em i tok, mipela olgeta, ol asailam sika
na ol wokmanmeri i stap wantaim bilip olsem
i no long taim bai ol i kamapim gut ples bilong
ol long stap.

Ol toktok bilong Meja Paul Maulds, i kamap
taim wanpela hanga straik bilong ol asailam
sika long prosesing senta i kamap long namba
faif de nau.

PacificBEAT

4. 5. 6am & 4pm. 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Putim mak...

Ol pipel bilong America putim mak...



OL sapota bilong Barack Obama i sanap harim toktok bilong en bihain long em i winim ilek-sen.



WANPELA Barack Obama sapota i soim kala bilong em long Taims Skwea long Nu Yok siti.

Barack Obama win gen...

RIPOT i kam long US i tok Presiden Barack Obama i kamap wina insait long risal bilong presidensal ileksen.
US Presiden Barack Obama i winim namba tu taim long opis, taim em i winim resis long wok bilong Presiden long mani salensim em bilong Ripabliken Pati, Mitt Romney.
Dispela em i namba tu taim insait long wanpela Presiden ileksen insait long planti yia em wanpela Demokret memba i winim narapela foapela yia olsem Presiden bilong Amerika.
Ausait long White House na Obama hetkwota, planti pipel i bin singaut na paitim han taim Ameriken TV netwok i tokaut long win bilong Barack Obama.



OL sapota bilong Mitt Romney i holim sain long Ripabliken ileksen nait long Boston Konvensen na Eksibisen Senta, pastaim long ol i painim aut olsem kendidet bilong ol i lus.



WANPELA Ripabliken Sapota i lukluk bihainim ol ileksen risal long ileksen nait reli long Boston, Massachusetts, long Novemba 6.




Amerika givim vot..



US Presiden Barack Obama i sanap antap long stej wantaim fes ledi, Michelle Obama, US Vais Presiden, Joe Biden, na Dokta Jill Biden, bihain long viktori toktok bilong en long Chicago, Illinois. Obama i winim ri-ileksen bilong em agensim kendidet bilong ol Ripabliken, bipo gavana bilong Massachusetts, Mitt Romney.



US Presiden, Barack Obama na meri bilong em Michelle, i holim pas bihain long Demokretik presiden i kamapwina bilong 2012 US Presidensal ileksen, long Tunde.



RIPABLIKEN Presidensal nomini, Mitt Romney i givim konsesen toktok bilong em long ilek-sen nait reli long Boston, Massachusetts, Novemba 7.



OL pipel i selebret long Taims Skwea, Nu Yok, bihain long Barack Obama i winim 2012 US Presidensal Ilek-sen.



US Presiden Barack Obama i givim ileksen nait viktori toktok bilong en long Chicago, Novemba 7.

TORO



BIABIA



KANAGE



TOKWIN

Godens maket stori i tru o nogat?

Dispela wik yumi harim olsem wanpela mama ol i bagarapim em long Godens maket we i kirapim bikpela toktok stret i tru o nogat.

Nau yet Suprintendent bilong Polis long Midia i mekim wanpela bikpela toktok long dispela asua i kamap

long Godens maket i no tru. Bikos em i no kisim wanpela polis ripot long dispela asua i kamap.

Em i kirap na tok husat i witnesim dispela asua i kamap long Godens maket mas kam na mekim ripot o dispela mama na wantok bilong em mas kam na mekim ripot.

Nau yet em i no lukim wanpela ripot na salim toksave long olgeta midia long tokaut husta

tru dispela ripota i mekim dispela stori long National pepa kirapim bikpela wari, pret na kros i kamap long pablik we i daunim polis dipatmen long ol i no mekim wok bilong ol. Dispela stori tu i kamap long ovasis pepa we i daunim yumi ol Papua Niugini long pasin bilong yumi olsem ol kanak na olsem ol pik na dok.

Tokwin Tasol...

A	T	R	I	T	H	E	T	F	S	I	A	S	E	A
A	J	L	S	M	H	E	I	W	L	F	L	J	L	I
L	S	E	L	A	L	E	I	W	L	F	L	J	L	I
I	T	F	E	E	S	F	L	F	A	A	X	N	I	I
I	A	S	A	H	J	S	L	X	U	G	L	S	J	I
S	E	E	U	L	I	I	E	S	L	E	L	I	I	I
S	E	E	U	L	I	I	E	S	L	E	L	I	I	I
A	T	S	J	J	E	I	W	A	T	E	F	A	T	F
L	I	J	L	J	A	L	M	A	S	L	L	L	L	L
I	T	L	I	H	I	N	S	H	E	H	I	S	A	I
S	J	L	S	S	S	C	E	W	T	E	D	O	E	C
S	J	L	S	S	S	C	E	W	T	E	D	O	E	C
I	S	E	E	H	H	I	L	L	I	S	L	L	L	L
I	S	E	E	H	H	I	L	L	I	S	L	L	L	L
T	E	E	F	A	A	T	I	I	F	H	T	I	F	H
W	S	E	A	S	I	J	N	E	D	A	L	L	S	A
A	L	I	L	L	U	E	I	E	A	H	S	I	S	E

Painim ol dispela toktok bilong ron long balus:

BALUS	AIR NIUGINI	AIRLINES PNG	MAF
ISLANDS NATIONAIR	PLES BALUS	KAGO	TI
KOPI	JIUS	BISKET	SIA LET
SIA	TIKET	SEKIN	SEKYURITI
LAP JAKET	EA HOSTES	PAILOT	SUTKES

2		4	9	6		1		5
	3			8				
	8	1				4	9	
7			1	4			3	9
		3		9		2		
9	6			3	2			1
	2	7				3	6	
				7			1	
3		6		1	4	8		

2	7	4	9	6	3	1	8	5
5	3	9	4	8	1	7	2	6
6	8	1	5	2	7	4	9	3
7	5	2	1	4	8	6	3	9
4	1	3	6	9	5	2	7	8
9	6	8	7	3	2	5	4	1
1	2	7	8	5	9	3	6	4
8	4	5	3	7	6	9	1	2
3	9	6	2	1	4	8	5	7

Ansa bilong las wik Sudoku

Ansa bilong las wik Pasol

T	A	R	A	G	A	U	B	I	L	O	N	G	N	A	I	T
				S												
K				E				K	U	M	U	L			P	
A				K	A	L	A	N	G	A	R				I	
A				A												
				K	O	K	O	M	O			S	I		K	
R				T							A	N		K	O	
G	U	R	I	A		A			R					A	K	
K							R		6					V	I	
							A		6		P	I	P	I	V	
				P	A	T	O	L	6		B					
I				O	E				A	A				I	B	
A			K	P					U	L					U	
N		T	T				K	A	K	A	T	U			K	
A	O		I						S						A	
K		A														
W				S	U	B	G	N	O	L	I	B	L	U	A	P

EMTV Television Guide

MANDE 5 NOVEMBA, 2012	
4:57 AM	G STATION OPEN
5:00 AM	G JOYCE MEYER EP#999-1
5:30 AM	G EMTV NEWS REPLAY
6:00 AM	G TODAY
9:00 AM	G CLASSROOM BROADCAST
9:00 - 9:40	GRADE 7 MATHEMATICS
9:50 - 10:30	GRADE 7 SCIENCE
10:40 - 11:15	GRADE 8 MATHEMATICS
11:20 - 12:00	GRADE 8 SCIENCE
1 PM - 3 PM	G C/B-CASTS continues.....
1:00 - 1:40	GRADE 6 MATHEMATICS
1:50 - 2:30	GRADE 6 SCIENCE
2:30 - 3:00	DEPI
3:00 PM	G KIDS KONA
3:00 PM	KINGDOM OF PARAMITHI#5/30
3:30 PM	NEW MACDONALD'S FARM
4:00 PM	THE SHAK
4:30 PM	KITCHEN WHIZ
5:00 PM	G FUNNIEST HOME VIDEO SHOW

TUNDE 6 NOVEMBA, 2012	
5:30 PM	G TRAPPED EP#16 -
5:57 PM	G CRIME STOPPERS
6:00 PM	G EMTV NATIONAL NEWS
7:00 PM	PGR ONCE UPON A TIME #17
8:00 PM	PGR ONCE UPON A TIME #18
9:00 PM	G TOKPIKSA
9:30 PM	G SPORTS SCENE
9:57 PM	G EMTV TOKSAVE
10:00 PM	G EMTV NEWS REPLAY
11:00 PM	AUSTRALIA NETWORK
TRINDE 7 NOVEMBA, 2012	
5:57 AM	G STATION OPEN
5:00 AM	G JOYCE MEYER EP#999-2
5:30 AM	G EMTV NEWS REPLAY
6:30 AM	G TODAY
9 AM - 3:00 PM	G THE RACE THAT STOPS THE NATION
2012 MELBOURNE CUP	
3:00 PM	G KIDS KONA

3:00 PM	KINGDOM OF PARAMITHI #6
3:30 PM	NEW MACDONALD'S FARM
4:00 PM	THE SHAK
4:30 PM	KITCHEN WHIZ
5:00 PM	G FUNNIEST HOME VIDEO SHOW
5:30 PM	G TRAPPED # 17
6:00 PM	G EMTV NATIONAL NEWS
7:00 PM	G HAUS & HOME #21
8:00 PM	G BUSINESS PNG EP#24
8:30 PM	PGR SURVIVOR PHILIPPINES -
10:00 PM	G EMTV NEWS REPLAY
11:00 PM	G AUSTRALIA NETWORK
5:57 AM	G STATION OPEN
5:00 AM	G JOYCE MEYER EP#999-3
5:30 AM	G EMTV NEWS REPLAY
6:30 AM	G TODAY
9:00 AM	G CLASSROOM BROADCAST
9:00 - 9:40	GRADE 7 MATHEMATICS
9:50 - 10:30	GRADE 7 SCIENCE

10:40 - 11:15	GRADE 8 MATHEMATICS
11:20 - 12:00	GRADE 8 SCIENCE
1 PM - 3 PM	G C/B-CASTS continues.....
1:00 - 1:40	GRADE 6 MATHEMATICS
1:50 - 2:30	GRADE 6 SCIENCE
2:30 - 3:00	DEPI
3:00 PM	G KIDS KONA
3:00 PM	KINGDOM OF PARAMITHI #7
3:30 PM	NEW MACDONALD'S FARM
4:00 PM	THE SHAK
4:30 PM	MR. MAKER
5:00 PM	G FUNNIEST HOME VIDEO SHOW
A moment of fun filled with laughter for the whole family to enjoy.	
5:30 PM	G TRAPPED #18 "Smoking Gun"
5:57 PM	G CRIME STOPPERS
6:00 PM	G EMTV NATIONAL NEWS
7:00 PM	PGR FACT FILES EP#6 - NORWAY

MASSACRE : The Survivor	
The survivors of the Norway massacre reveal first-hand their terrifying ordeal Anders Behring Breivik is a Norwegian accused mass murderer, terrorist and the confessed perpetrator of the atrocious attacks in Norway on 22nd July last year (2011).	
8:00 PM	G PACIFIC FUTURES
A panel discussion with various Pacific Nations in relation to Urbanisation.	
9:00 PM	PGR DANGEROUS DRIVER'S SCHOOL
10:00 PM	G EMTV NEWS REPLAY....
11:00 PM	G AUSTRALIA NETWORK

Ol Progam na Kilok i ken senis oltaim...



NEM: Berthlyn Huaffe
KRISMAS: 16(Meri)
ADRES: Passam Primary School, P.O. Box 521, Wewak East Sepik Provins
SAVE LAIKIM: Harim musik, pilai soka, pilai volibol mekim pani, kisim wara, watsim TV na ritim Baibel.

NEM: Jimmy N. Nimms
KRISMAS: 19 (man)
ADRES: Kilipau village, P. O. Box 56, Vanimo Sandaun Provins
SAVE LAIKIM: Raitim pas, ritim buk, harim musik, ring long fon na senisim presen.

NEM: Rodney Wauku
KRISMAS: 25 (man)
ADRES: C/- Andrew Api Vanimo CIS, PO Box 124, Vanimo Sandaun Provins
SAVE LAIKIM: Harim musik, pilai soka, watsim TV, swimming na painim stori.

NEM: Jason Sull
KRISMAS: 40 (Man)
ADRES: P.O. Box 248, Madang - Madang Provins
SAVE LAIKIM: Ritim Niuspepa, harim musik, kukim kaikai, wasim klos, wokabaut, trevol go kam long bisnis insait long PNG na painim poromeri long stap wantaim oltaim.
 Yu ken ring long dispela namba, 7272 2843.

NEM: Jimmy Ekoda
KRISMAS: 20 (man)
ADRES: Sangara Vocational School, P O Box 170, Popondetta, Oro Provins
SAVE LAIKIM: Go lotu, pilai soka, pilai volibal, painim wanpela meri long maritim na stap wantaim oltaim.

NEM: Joe .K
KRISMAS: 24 (man)
ADRES: P O Box 1289, Goroka, EHP - 7360 3650
SAVE LAIKIM: Go lotu, pilai musik singim song, pilai spots, mekim pren na planti moa.

NEM: Gima Target
KRISMAS: 20 (meri)
ADRES: Bugandi Secondary School, PO Box 1225, Lae Morobe Provins
SAVE LAIKIM: Go lotu, ridim Baibel, mekim pren wantaim ol lotu manmeri, pilai ragbi,volibol and watsim TV(News).

NEM: Presley Tai
KRISMAS: 20 (Man)
ADRES: PO Box 28, Mondomil Minj, Jiwaka Provins
SAVE LAIKIM: Go lotu, ritim Baibel, ritim buk, stadi skul wok, pilai ragbi, harim musik na mekim poroman wantaim arapela.

NEM: Belany Haikope
KRISMAS: 19
ADRES: Don Bosco Araimiri Secondary, PO Box 159, Kerema Gulf Provins
SAVE LAIKIM: Ritim buks, pilai gems, go lotu long Sande, mekim pani wantaim poroman.

NEM: Bunau Dadis
KRISMAS: 31 (man)
ADRES: Raibus Security Service Ltd, PO Box 1337, Madang, Madang Provins - 7146 7257
SAVE LAIKIM: Go danis, Lukim TV, harim musik na painim gutpela poromeri long stap wantaim oltaim.

Raun wantaim Kanage olgeta wik

Karim lek bilong yu go tu....

Kanage go lukim wanpela poro bilong em long kisim saw bilong katim timba...Poro bilong em i bin borowim long wanpela mun i go pinis na Kanage i les long wet na go long haus bilong em... Poro bilong em i lukim Kanage wokabaut i kam longwe yet na em tokim misis bilong em, sapos Kanage kam askim long mi, tokim em olsem mi go Koki maket long painim buai...Nau poro i go hait klostu long laplap i banisim dua... I no long taim na Kanage i go kamap na askim misis bilong poro long man bilong em na misis i giamanim Kanage... Kanage laik lukluk i go insait long haus, em lukim tupela lek bilong poro na em tokim misis,...Sapos man bilong yu kambek, tokim em long kisim tupela lek bilong em i go wantaim em...



Mi raun wantaim marit man na mi laikim helpim long dispela wari mi gat

Dia Laipain,
MI painimaut olsem man mi raun wantaim i gat meri. Na mi no bilip long lav bilong ol man husat i marit pinis.
Tasol mi gat bikpela laik long em na mi laikim bai mitupela i serim laip wantaim. Yu ting olsem wanem?
Em orait long mi raun wantaim man ya o mi tokim em long lusim mi.

Confused

Dia Pren,
 Yu gat bikpela laik pasin long wanpela man husat i marit pinis long meri we i gat wankain piling olsem yu.
 Mipela i luksave long ol manmeri husat i save painim isi long gat laik pasin long narapela na long ol manmeri i save painim hat tru long lusim ol.
 Mipela i laikim olsem yu mas lukluk long dispela na skelim gut pastaim,



nogut yu gat bel we yu no laikim pikinini long en sapos em i tru olsem dispela man em i stap pas wantaim meri na famili bilong em.

Yu mas save olsem sapos yu gat wanpela pikinini i nogat papa, bai yu bungim bikpela hevi sapos yu nogat gutpela wok na haus long lukautim pikinini bilong yu.

I gat planti man husat i gat wankain krismas olsem yu we yu ken poromanim na bihain taim, i ken maritim yu na karim ol pikinini olsem blesing God papa i givim.

Em bai gutpela sapos yu na pren bilong yu wantaim meri bilong em i mas

lus tingting long dispela pren pasin na yu helpim dispela man long stap gut wantaim meri bilong em na lukautim em.

Serim dispela wantaim wanpela famili man o meri husat yu ting olsem yu ken trastim o askim pasto long givim yu ol gutpela stiatok na tu, pre long yu.

Tenkyu tru,
 Mi Laipain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Nesenel Maining Imejensi na Rispons Salens bai kamap long Mosbi

James Kila i raitim

OI IMEJENSI rispons tim bi-long olgeta maining kampani insait long Papua Niugini bai bung long Mosbi long Novemba 14 na 15 long stap insait long wanpela bikipela salens ol i kolim Nesenel Maining Imejensi na Rispons Salens (NMERC).

Dispela salens bai kamap long Se John Guise Stadium long Mosbi na long dispela yia kampani we i sponsa long en em Porgera Joint Vensa (PJV).

Ripot i kam long Nesenel Maining Sefti Kaunsil, wanpela divisen bilong Mineral Risoses Atoriti i tok olsem wankain olsem namba wan salens we i bin kamap long Lae So Graun long las yia, salens long dispela yia bai i lukim ol tim bilong ol maining kampani long PNG i soim kain kain ol stail na rot bilong abrusim birua taim birua i kamap long ol main long sait bilong sefti na helt. Sampela ol petroleum kampani tu bai soim stail bilong ol long dis-

pela salens long Mosbi.

Salens bilong dispela yia bai lukim ol tim bilong ol maining kampani i salens long sait bilong kilim indai bikipela paia, daunim birua long ol strongpela marasin o kemikol, painim na halivim ol lain i stap long birua na tu yusim rot long sevim ol lain long sait long maunten na ol arapela salens. Bai gat salens tu long sait bilong raitim ol plen bilong imejensi long pepa tu i kamap.

Ol tim husat i win long dispela kompetisen namel long ol imejensi tim bai ol ogenaia i givim sil o tropi na tu MRA wantaim PJV bai givim ol seftifiken long luksave long wok bilong ol na tu long soim stap bilong ol insait long dispela 2012 Nesenel Maining Imejensi salens.

Nesenel Maining Sefti Kaunsil i tok klia olsem NMERC em ol i wokim kamap olsem wanpela eria we i ken bringim gutpela wok bung o patnasip namel long ol stekholda, na tu strongim pasin bilong wok bung wantaim insait long risos indastri long traim daunim ol birua we

i kamap long eria bilong helt na sefti.

Namba wan Nesenel Maining na Imejensi Rispons Salens i bin kamap long Lae long mun Mas 2011.

Nesenel Maining Sefti Kaunsil i senisim sampela ol kain lukluk bilong sefti rispons na long dispela yia tasol long mun Mas, PNG long namba wan taim tru i bin luksave long Nesenel Maining Sefti Wik we i bin kamap long mun Mas 2012 long olgeta main insait long PNG.

Eking Menesing Dairekta bilong MRA, Philip Samar bai opim dispela salens wantaim kaikai long Gateway Hotel long Mosbi long Tunde, Novemba 13.

Nesenel Maining Sefti Kaunsil i tok tokauyt tu olsem bihain long dispela bikipela salens, ol askim Praim Minista, Peter O'Neill, Maining Minista, Byron Chan, vais minista bilong Maining, Wera Mori, Minista bilong Petroleum Eneji, William Duma na Gavana bilong Nesenel Kapital Distrik (NCD), Powes Parkop bai stap long presentesin o

givim prais long ol tim i bin long seremoni we bai kamap long Gateway Hotel long Novemba 15.

Long redim ol yet long dispela salens, ol imejensi rispons tim (ERT) bilong olgeta maining kampani long PNG i redi na mekim trening bilong ol i stap.

Long Ramu NiCo projek long Kurumbukari maunten na tu long Basamuk Rifaineri bilong Ramu NiCo long Raikos, ol wok lain bilong ERT i go het long mekim ol kain kain trening bilong ol long go soim stail long Mosbi.



Ol Imejensi Rispons Tim (ERT) tim bilong Ramu NiCo i trening hat tru long go long Mosbi long Nesenel Imejensi na Rispons Salens.



ERT bilong Ramu NiCo i soim rot long sevim wanpela man taim paia i kamap.
Ol foto: James Kila

Tin pis em isi nau long baim . . .



NIKEL NA KOBALT: Ol nupela mineral Ramu NiCo i rausim long graun long Kurumbukari maunten long Madang. *Poto: James Kila*

Ol nupela mineral bai helpim PNG ekonomi bihain – Samar

James Kila i raitim

PAINIM bilong ol nupela mineral long PNG em bikpela samting tru long ekonomi bilong kantri bikos em bai helpim taim prais bilong ol arapela mineral olsem gol, kopa na silva i pundaun long wol maket.

Eking Menesing Dairekta bilong Mineral Risoses Atoriti (MRA), Philip Samar i bin mekim dispela toktok taim em i raun lukim ol projek long Usino-Bundi distrik long Madang provins las wik i go pinis. Mista Samari i tok olsem wok long kisim graun olsem nikel na kolbalt we Ramu NiCo i mekim long Kurumbukari maunten long Usino-Bundi em wanpela nupela kain projek tru na i wok wantaim nupela kain mineral o graun we nogat wok long en i bin kamap long PNG long bipo. Olsem na em bikpela samting tru long PNG maining indastri sekta.

Mista Samar i tokaut tu olsem Ramu Nikel Projek em nupela kain ekstraktng indastri wok we i kamap nau long kantri, na i no wankain olsem gol, kopa na silva we i bin kamap bipo na planti lain i save long en.

Narapela mineral we i kamaut tu long nikel na kobalt em ol i kolim kromait na dispela mineral tu i gat maket bilong en long ovasis.

Mista Samar i tok tu olsem narapela nupela kain projek we i kamap tu long Usino-Bundi distrik em Yandera Main we nau yet Australia kampani Marengo Maining Limited i wok long go pas long en.

Em i tokaut olsem insait long gol na kopa we Marengo bai rausim long Yandera, i gat narapela mineral tu i stap we nogat kampani long bipo i bin wok long main long en. Dispela mineral em ol i kolim 'molybdenum'.

Em i tok Gavman blong PNG i wok long lukluk i go insait long ol

arapela mineral maining bes na dispela tupela bikpela projek long Madang em Ramu Nikel na Yandera Main i kamapim nupela lukluk stret na i putim PNG long gutpela posisen taim i gat hevi long sait long prais bilong ol arapela mineral olsem kopa, gol na silva long bihain.

"Mipela i amamas olsem taim prais bilong kopa, gol na silva i bungim hevi long wol metal prais, mipela i gat nikel, na molybdenum i stap long sapotim expot bes bilong mineral bilong PNG," Mista Samar i tok.

Em i tok tu olsem prais bilong gol na kopa i wok long go antap na go daun olgeta taim long wol maket, olsem na painim bilong ol nupela mineral em bilong samting tru long nesenel ekonomi bilong PNG. Kantri blong yumi i ken sanap strong long ol narapela mineral olsem nikel na ol arapela taim hevi

bilong wol metal prais i bungim yumi.

Mista Samar i tok tu olsem Gavman insait long las 18 i go 24-pela mun i wok long lukluk raun long painim wanpela developa long kamapim wanpela koul projek long Daru, Westen provins.

Em i tokaut olsem dispela kol projek long Daru bai narapela projek we i kantri i ken kisim mani long sapotim ekonomi bihain.

Dispela lukluk raun bilong Mista Samar i go long Usino-Bundi distrik long Madang, em i go wantaim Memba bilong Usino-Bundi yet, Anton Yagama long lukim wanpela rot projek we MRA i makim Gavman long putim mani long kamapim wok.

Mista Samar i tok amamas long ol wok nau yet i go het long dispela rot we bai stat long Banu Bris i go olsemta long Bundi stesen.

Dispela rot em pastaim i lukim nogat wok developmen i kamap long en olsem moa long 20 yia na

dispela i save givim hevi long moa long 20,000 pipel bilong Bundi LLG.

MRA i bin givim K2 milien long dispela rot projek makim Gavman aninit long Ramu Nikel Projek agri-men.

Mista Samar i amamas long lukim namba wan hap bilong wok long fes seksen bilong rot long Banu i go long Baia riva.

Em i tok klia tu olsem Gavman i surikim lukluk bilong em nau long ol projek, na i no inap toktok nating long ol helpim em bai givim, tasol nau em i mekim skoping o wok long plenim na bihain mekim kos bilong wok na i tok-orait long wanem wok long kamap.

Mista Samar i tok dispela kain pasin bilong wok i no bin kamap bipo long wankain agrimen olsem.

Dispela K2 milion MRA i givim long rot projek i kam aninit long Pablik Invesmen Projek (PIP) bilong moa long 30-kilomita rot long Banu i go olgeta long Bundi stesen.

Komyuniti stoa halivim ol papagraun

WANPELA nupela join vensa wok namel long ol lokol lenona kampani, na RH Trading i lukim moa gutpela samting bai kam yet long ol komyuniti i sindaun raunim Likwifait Netseral Ges (LNG) Plent ol i wok long sanapim ausait long Pot Mosbi.

Ol dispela grup, wantaim sapot i kam long PNG LNG Projek na Laba, i wokbung gen long opim namba faiv supamakot bilong en.

Dispela stua i stap long Laba Holdings sait, klostu tasol long BSP Rural Laba benk.

Nupela mini-maket i opim dua bilong en long Oktoba19 long givim sevis long ol

wokman na komyuniti raunim plent sait.

"Mipela i skin kirap long ol gutpela PNG LNG Projek i gat long givim lokol komyuniti long dispela stoa," John Aylward, CJJV Plent Sait Ekstenal Afes Dairekta, i tok. CJJV em i namba wan bikpela kontrakta i go pas long konstraksen bilong LNG Plent.

"Em i stap long ples klia, em i gat ol gutpela prais, na i givim gutpela sindaun long wanwan long foapela komyuniti bilong mipela, aninit long ol lenona kampani bilong ol."

Stua i salim kain kain samting long rais, flawa, ol tin kaikai na ol ais mit, i go long ol kain

kain kaikai na sof dring, wantaim ol arapela samting yu nidim long haus. Dispela komyuniti stua i save sotim taim bilong ol asples, na nau ol i ken mekim soping long ples tasol.

"Dispela stoa i gutpela na i stap klostu tru long ples," Molly Baron, husat i save stap long Papa viles, i tok. "Olgeta nid bilong mipela, em dispela stua inapim, na mi bai yusim planti taim."

Bisnis operesen i kam aninit long RH, na ol wokmanmeri bilong en i kam long foapela asples, husat bai kisim operesens na menesmen trening long RH yet.

RH Tradomg Jeneral

Menesa, Ang Cheng Chooi, i tok kampani bilong em i amamas long stap insait long eria, na givim sevis long ol komyuniti.

"Ol winmani em ol lenona kampani i save brukim na skelim. Ol ples manmeri bai kisim wok, trening na ritel bisnis sevis bai go klostu moa long ol ples," em i tok.

"Tenkyu long menesmen bilong PNG LNG Projek long givim mipela dispela sans long wokbung wantaim ol lenona kampani long mekim dispela projek i kamap gut. Mipela bai wokbung moa sapos i gat rot bilong wokbung i stap."



Ol kastoma i sekim ol samting insait long nupela RH komyuniti stua.

O'Neill tok strongim pren na wok bisnis wantaim Saina

PRAIM Minista Peter O'Neill i tok pasin pren long wok bisnis i wok long groa wantaim ol nupela invesmen o wok bisnis i wok go het.

Long wanpela brekfas miting wantaim His Ekselensi Zhou Tienon, Vais Siaman bilong Stending Komiti bilong Saina Nesenel Pipels Kongres (NPC), long Grand Papua hotel las wik Sande, Mista O'Neill i tok makim Saina olsem wanpela bikpela divelopmen patna insait long Pasifik.

"Mi laik luksave long bikpela tred na invesmen wok ol Saina bisnis i stap long PNG i wok mekim, na tu, ol divelopmen projek olsem Ramu Nikel Projek, Lae Sipbris Diveopmen, Konstraksen bilong Intanesenel Konvensen Senta long Konstitusen Pak long Waigani, na Hailans Haiwe Riabilitesen o stretim Projek.

"Olgeta ol dispela invesmen i bikpela samting long PNG, na bai halivim ekonomi bilong mipela long groa. Mi amamas tu long luksave olsem mipela i lukim gutpela ekonomik groa insait long las 8-pela yia," em i tokim Mista Zhou, husat i bin kam raun

long kantri long opisal visit long Novemba 4 i go 5.

Mista O'Neill i tok ol strongpela wok-pren i stap wantaim Papua Niugini wantaim ol strongpela diplometik rilesens wantaim gavman bilong Pipels Ripablik ov Saina long 1976, na strongpela bihainim bilong "One China Polisi".

Mista O'Neill i tok tenkyu long Gavman bilong Saina i lukautim gut delegesen bilong em taim em i bin raun i go long Saina long mun Sep-temba.

"Mi bin gat ol gutpela tok-tok wantaim Vais Premia Li Keqiang, Vais Foren Minista Cui Tiankai, na ol bikpela investa olsem EXIM Benk bilong Saina, Saina Metallurgical Kampani, SINOPEC, COVEC, na Saina Railway," em i tok.

Long bekim, Mista Zhou i tok em i tok tenkyu long gutpela pasin na luksave em i kisim long PNG, na tok i gutpela wok pren namel long tupela kantri i strong yet.

Mista O'Neill i tokaut olsem em i tingting long raun i go long Saina gen long namel bilong neks yia, na Mista Zhou i tok wanbel tasol.



Sampela long ol patisipen i sanapim wanpela pis pon long wanpela praktikel sesen.

Inlen pis faming pulim ol yangpela



Wanpela lapun mani sindaun na ridim wanpela pepa long pis faming.

PLANTI yangpela manmeri long Biangai grup ples insait long Wau-Bulolo distrik bilong Morobe i soim bikpela laik long go insait long inlen pis faming wok.

Wanpela wan-wik inlen pis faming trening i bin kamap long Winima viles, na pulim planti yut, ol man na meri, na sampela ol lapun manmeri bilong Werewere, Elauru na Winima. 12-pela meri i bin sindaun long dispela trening.

Lukautim pis insait long wanpela raunwara, em i nupela samting long planti ol dispela yangpela, na ol arapela insait long komyuniti. Sampela ol inlen pis faming trening i bin kamap bipo, na o pipel i lainim olsem ol tu i ken kirapim kain projek olsem, na kisim gutpela bilong en.

Ol lain long Winima trening i kisim besik pis faming menesmen, pis pon konstraksen na ol gutpela bilong pis faming. Ol i bin sanapim wanpela model pis fama grup.

Tupela patisipen, Yawi Kilimbu na Julie Waia i tok trening ol i kisim em ol besik save longlukautim pis olsem wanpela abus bilong famili bilong ol, na winmani taim i gat planti moa pis bilong salim.

Mista Kilimbu em i wanpela yangpela man husat i

ting inlen pis faming em bilong ol nambis manmeri tasol.

Taim em i sindaun long dispela trening, em i save olsem ol pipel long ol maunten tu i ken lukautim pis long ol raunwara.

Em i tok: "Dispela trening i opim tru ai bilong mi. Nau mi save olsem mipela i ken lukautim pis. Mi amamas tru long Hidden Valley main long bringim dispela infomesen i kam long mipela."

Mis Waia i tok: "Mi sindaun long wanpela pis faming trening bipo, na mi traim long bihainim, tasol bikos save bilong mi i no inap, mi no go het long en. Wantaim ol besik skills na save mi gat nau long dispela trening, mi ken pinisim driman bilong mi."

Viles lida bilong Winima, Philip Kagowe, i tok tenkyu long main long kamapim dispela trening. Em i strongim ol patisipen long yusim save ol i kisim, long gutpela long sindaun bilong ol.

Trening long Winima em i namba tu bilong ol Biangai pipel. Em i namba 8 trening Morobe Fiseris Menesmen Atoriti i mekim, wantaim mani halivim i kam long Hidden Valley main. Ol arapela patna em Mumeng Fish Farmers Cooperative, na Wau Lokol Level Gavman.

Laik bilong stap namba wan long kantri

Ok Tedi Lenona Royalti Invesmen Tras laik go pas

INVESMEN Tras bilong ol Sta Maunten pipel bilong Westen Provins, i laik kamap namba wan tras long kantri. Long inapim dispela driman, Bod ov Trastis na Tras Menesmen i wok long wokbung long inapim laik na astinging bilong dispela lenonas tras.

Ok Tedi Lenona Royalti Invesmen Tras o OTLRIT em i wanpela invesmen tras ol i sanapim aninit long wanpela 'Tras Did' long Novemba 2004 bihainim tok orait bilong ol lenona o papagraun bilong Ok Tedi Main, Ok Tedi Mining Ltd, na PNG gavman long menesim 20% royalti bilong ol main ples.

Menesmen tim bilong OTLRIT long Mosbi, i bin stap long Westen Provins las wik long mekim moa aweanes long 12-pela viles long invesmen bilong ol.

Disela 12-pela viles em Finalbin, Bultem, Wangbin, Migalsim, Ankit, Ok Tedi Taun, Kavorabip, Nioksikwi, Kumkit, Atemkit, Korkit na Kawentikim.

Tras Bisnis Developmen Menesa, Joseph Kanol i tokim ol komyuniti olsem papagraun tras, i wok long inapim driman bilong en long gutpela wok gavanens, transparensi na gutpela menesmen bilong ol risos ol i gat.

Em i tok bod i bin oraitim long 2008 yet, wanpela invesmen strateji bilong ol yia 2009 i go inap 2013, na dispela bai lukim tras i holim K100 milian long 2013, na bihainim yet dispela strateji, ol i mekim sampela ol invesmen long PNG yet, na long Australia, em tupela residensal kompleks na wanpela komesal bilding long Pot Mosbi, na ol invesmen ovasis em 42 rum Quality Inn Airport Heritage, na tupela apatmen long Brisben, 32 rum Colonial Motor Inn long Campbelltown Sydney, na 63 rum Madang Star International Hotel long Madang.

Tras gat wanpela twin ota balus em i lisim long wanpela bikpela PNG elain kampani, na ol PNG ekwiti i stap.



Gavman welkamim bikpela eneji kampani bilong Frans

O'NEILL na Dion Gavman i welkamim kam bilong Frans eneji kampani, Total S.A., em wanpela bikpela wel na ges kampani long wol i kam long Papua Niugini.

Bihainim toksave bilong PNG kampani, Oil Ses Limited long dispela wik, long kirapim sampela intres bilong ol long Galp bilong Papua, Prais Minista Peter O'Neill i tok olsem kam bilong Total em i kisim konfidens long gavman bilong em na kantri.

Mr. O'Neill tenkim Oil Ses kampani long kisim Totol SA i kam insait long PNG; na tu long kampani i gat bilip long PNG na i stap moa long 80 krismas long mekim wok invesmen insait long PNG.

"Long makim maus bilong gavman na pipel bilong dispela kantri, mi welkamim Tatol SA long PNG.

PNG i ken amamas long lukim olsem nau mipela gat tripela bilong bikpela 6-pela wel na ges kampani long wol i wok i stap insait long PNG. Tupela narapela kampani em long Shell na Exxon Mobil.

"Gavman bilong mi i sanap redi

long wok wintaim ol investa na lukluk gut olsem strong insait long dispela kantri em mas stap. Papua Niugini mas amamas olsem em inap long holim strong bilong bisnis komyuniti long taim wol i wok long bungim hevi long sait bilong ikonomi o mani long dispela taim. Tasol PNG i soim ol investa laik long wokim bisnis wantaim mipela," Mista O'Neill tok.

Em i tok wanem kain bisnis dil bai kisim tok orait bilong Minista na Oil Ses na Tatol long 5-pela laisens eria long kantri yenta ausait bilong Galp bilong Papua rijen insait long PNG, na wanem ol kampani bai gat intres long developim nupela LNG Projek long PNG.

Total S.A. em i wapela bikpela wel na ges kampani bilong kantri Frans.

En i wapela long 6-pela top wel kampani insait long wol.

Bisnis bilong em i karamapim olgeta wel na ges, long krut wel na naturel ges painim na wokim long pawa statim, trenspotim, refainim, petroleum prodak maket na intansenel krut wel prodak making na treading.

Kerosin, petrol na disel prais go daun dispela mun

PRAIS bilong kerosin, petrol na disel i go daun liklik dispela mun.

Daunim bilong prais bilong wan wan lita long tripela fiul wantaim, em Indipenden Konsuma na Kopetisen Komisn, i tok, i bihainim daunim long Impot Pariti Prais bilong olgeta petroleum prodak dispela mun.

Petrol, bipo em i K1.83 long wan lita, nau bai K1.81.

Disel, bipo em i K1.96 long wan lita, nau bai K1.93.

Na Kerosin, bipo em i K1.95 long wan lita, nau bai K1.92.

Komisina bilong ICCC, Billy Manoka, i tok ol opisa bilong en bai karimaut ol wok inspeksen long olgeta sevis stesen stat long Novemba 8, long sekim olsem olgeta prodak ol i salim bihainim ol nupela prais mak.

Em i askim olgeta fiul saplaia na ritela long setim prais bilong ol insait long mak bilong mun Novemba.



Wantok

NIUSPEPA BILONG YUMI OL PNG STRET!

Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the **WANTOK** to you each week. We publish the **WANTOK** 52 times a year.

AIRMAIL SUBSCRIPTION RATES (includes postage & handling)
PNG K220.00, Australia/New Zealand US\$110.00, Asia/Pacific US\$150.00
Rest of the World US\$210.00

NCD HOME DELIVERY
80t per copy or K65.00 for two or more copies. Office pickup K52.00 per year for a copy.

Please send me.....copy/copies of WANTOK for one year.

I enclose Kina/USD..... as full payment.

Name.....
Postal Address.....
City.....
State/Province.....(abbreviation)
Country..... Zip/Postal Code.....
Street Address.....
Telephone.....Fax.....
Email.....
Signed.....Date.....

Address: Subscriptions
Word Publishing Company Ltd
PO BOX 1982
Boroko, NCD 111
Papua New Guinea

Attn: **Luke MEK** (Circulation & Distribution)



GLASIM RAMU NICO PROJEK



Wanpela Ramu NiCo, Wanpela Komyuniti

CCI amamas long lukim Ramu NiCo kakao extensen

WANPELA sinia agrikalsa extensen speselis o save-man bilong PNG Kakao Kokonas Institiut (PNGCCI) i amamas long lukim olsem wok bilong kakao developmen long hap bilong Astrolabe Be eria long Raikos distrik long Madang provins i wok long go het gut tru.

Wok bilong kakao developmen long ol eria long Astrolabe Be em sampela eria em Ramu NiCo insait long Komyuniti Afes Agrikalsa Seksen bilong en i wok long promotim long halivim ol rurel famas insait long Kostal Paipain eria bilong Ramu Projek.

Wanpela agrikalsa saveman husat i wok longpela taim long Madang, na nau i wok olsem Progreman Menesa wantaim PNGCCI, Vincent Salle long las wik i bin mekim lukluk raun bilong em i go long Astrolabe Be eria long Raikos distrik na i amamas long lukim kakao developmen wok long hap i gohet gut tru.

Mista Salle i bin mekim lukluk raun i go long ol blok bilong ol rurel fama long ol viles long Astrolabe Be olsem Erima, Bom, Lalok, Malle, Bongu, Songum, Sakwanam na Marakum.

Wanem samting Mista Salle i lukim i kirapim bel bilong em stret, na em i tok em i amamas long wok bung wantaim Ramu NiCo long bringim moa teknikal edvais na trening long sait long kakao developmen i go long ol famas insait long Raikos distrik.

Ramu NiCo, bikipela developa bilong nikel/kobalt main Projek long Madang provins i save halivim ol rurel famas insait long Kostal Paipain Projek eria bilong en long Raikos distrik wantaim teknikal edvais long sait bilong agrikalsa. Ol dispela teknikal edvais na tu trening ol ofisa bilong en i save mekim wantaim ol fama long ol ples na blok we i stap arere long paipain bilong Ramu NiCo we i karim ol slari o graun stat long Kurumbukari maunten i go daun long bikipela rifaineri bilong Ramu NiCo i stap long Basamuk long Raikos distrik.

Dispela lukluk raun bilong Mista Salle tu i go wantaim wok bilong PNGCCI long promotim haibrid kakao klons i go long smolholda famas insait long kantri, na Raikos em wanpela eria long Madang provins em ol i laik promotim..

Insait long dispela wok raun long las wik i go pinis, ol lain bilong Ramu NiCo wantaim Mista Salle i luksave na kisim nem bilong 42-pela kakao famas em ol bai saplain haibrid kakao klons i go long ol pastaim long pinis bilong dispela yia.

Ramu NiCo i tok klostu wantaim Kakao kokonas risets na ekstensen ejensi bilong gavman em PNGCCI long promotim teknikal edvais long groim kakao, lukautim kakao, na stretim na groim gut kakao long sait

long rihabilitesen insait long Ramu Projek impekt eria stat long Kurumbukari, Inlen Paipain eria, Kostal Paipain na Basamuk eria we Ramu Projek i karamapim.

Mista Salle i tok klia olsem taim ol rurel famas i planim ol haibrid klons long gaden bilong ol, ol bai helpim long kamapim moa kakao long wan wan hekta gaden bilong ol na tu prodaksen bai go antap. Dispela em bikos wok stadi o painimaut i soim pinis olsem ol haibrid kakao klons i save karim moa frut o kakao pod insait long wanpela hekta gaden.

Em i tokaut tu olsem CCI i gat tingting nau long givimaut moa long 5,000 haibrid kakao klons i go long ol rurel famas long Raikos distrik.

"Long nau mipela i gat samting olsem 10,000 klons i stap long badwud neseri blong CCI long Miak long Karkar Ailan na narapela 5,000 klons i stap long Stewart Risets Institiut long Murunas," Mista Salle i tok.

Em i tok taim ol rurel famas long Raikos i gohet long planim moa kakao klons, kakao prodaksen long wan wan hekta bai go antap na tu prodaksen we i go aut long Madang provins tu bai go antap.

Ramu NiCo Agrikalsa Seksen supavaisa, Allan Wahwah na trening ofisa, Aldam Bande i tok olsem Ramu NiCo i wok long gohet long kamapim ol agrikalsa program bilong en long Projek Impekt eria bilong en olsem wok bilong komyuniti obligesen o wok em mas mekim long halivim aninit long memorandum ov agrimen (MoA). Tasol bikipela wok bilong Ramu NiCo stret em long developim na lukim prodaksen bilong nikel na kobalt long Kurumbukari i go daun long Basamuk Bris na sip i ken karim i go ovasis na bringim mani ikam insait long Papua Niugini.

Dispela agrikalsa wok i go wantaim as-tingting bilong Ramu NiCo long promotim sasteinabel developmen insait long ol Projek Impekt komyuniti bilong en long Madang provins.



PNGCCI Progreman Menesa long Madang, Vincent Salle lukluk raun long kakao blok long Male ples.



Mista Salle i soim mak long planim klon kakao.

Salle i sindaun stori wantaim ol kakao famas insait long blok long Male.



Kakao i gro gut tru long blok bilong dispela fama long Sakwanam ples.



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisinim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 bilian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

**Wanpela
Ramu NiCo,
Wanpela
Komyuniti**



Gem i gat olgeta samting

SAMPELA spot i save gat ol stail bilong pilai we i wankain olsem long ol arapela.

Wanwan loa, bal, pilai graun na ol arapela samting tu i save wankain.

Bai yu lukim dispela long plan-ti ol spot we i wankain liklik o i kamap long wanpela kain rot tasol.

Kain ol pilai olsem ol ragbi lig, ruls futbol, soka na ragbi yunion em sampela long ol spot we i save gat planti samting i wankain namel long ol.

Tasol wanpela spot we i gat stail bilong dispela olgeta spot i stap insait long en em gelik futbol (Gaelic Football).

Insait long gelik futbol bai yu lukim ol i takol olsem long ragbi, paitaim bal long han olsem long ruls futbol, gol pos bilong ol i olsem bilong ragbi na soka na bal bilong pilai tu i olsem bal bilong soka.

Ol pilai i ken karim bal na ron olsem ragbi na ruls futbol na ol i ken putim long graun tu na kik olsem soka.

Histri bilong gem

Planti an i bilip gelik futbol i stat long wankain taim olsem ragbi yunion na soka bilong wanem em i gat planti kain stail we i kam aut long dispela tupela spot.

Tasol gem we i wankain stret olsem gelik futbol em Australian Ruls Futbol, wanwan stail bilong pilai na loa bilong gem i no wankain na bal bilong dispela tupela gem tu i no wankain.

Ol i raitim gut ol loa bilong pilai Gelik futbol long 1887 tasol namba wan taim tru ol i bin pilaim em long 1808.

Stat bilong wanpela kain futbol gem tru i kamap long Ailan (Ireland) em long 1308 taim wanpela soka gem i bin kamap long hap.

Planti kain futbol gem i kamap long Ailan long dispela taim, long wanpela ples, ol i save tok orait long holim soka bal long han na kikim olsem long ragbi.

Dispela kain ol pilai kamap inap long 1695 taim ol i kamapim wanpela loa long stopim ol dispela pilai.

Ailan i bin gat sampela hevi wantaim Inglen (England) na i tambuim olgeta spot bilong Inglen olsem soka na ragbi long kamap lo ples bilong ol.

Dispela i mekim na ol i kamapim na strongim gelik futbol we ol i save kolim olsem kaid (caid).

Tasol ol i no bin inap long pas-sim tru strong na swit bilong soka na ragbi na i no long taim ol i kisim sampela ol stail bilong dispela tupela spot i go insait tu long gem bilong ol.

Nau bai yu lukim ol i takol na holim ol narapela pilaia olsem long ragbi tasol bal bilong ol i raupela olsem bilong soka.

Long wankain taim, ol i ken kikim bal long graun olsem soka o ol i ken holim long han na kikim olsem ragbi na ruls futbol.

Stail bilong pilai

I save gat tupela tim pilai

insait long dispela gem.

Wanwan tim i mas i gat 15 pilaia long en.

Pilai graun bilong gelik futbol i luk wankain olsem bilong ragbi tasol i longpela na bikpela moa.

Longpela bilong en inap long 145 mita na bikpela bilong en inap long 80 o 90mita na i gat tupela gol pos long wanwan hap long pinis bilong pilai graun.

Dispela ol gol pos i luk olsem gol pos bilong ragbi tasol i save gat net long aninit bilong gol pos olsem long soka we wanpela pilaia i save was long en olsem goli – wankain olsem long goli bilong soka.

I save gat tupela hap insait long wanwan gem, wanpela hap em 30 minit bihain i save gat malolo bipo ol i pilai narapela 30 minit long namba tu hap bilong gem.

Ol i save pilai wantaim wanpela raupela bal olsem bilong soka na volibol na yu ken givim bal i go long wanpilai bilong yu wantaim han o kikim long lek.

Astinging bilong gem em long kikim bal i go insait long gol pos bilong narapela tim.

Dispela gol i ken kamap long antap o aninit bilong gol pos we goli sanap long en.

Gelik futbol long PNG

Gelik futbol i ken kamap long Papua Niugini tasol i mas i gat gutpela aweanes i kamap long skulim ol manmeri long en.


I gat ol soka na ragbi pilai graun i stap we gelik futbol i ken kamap long en olsem na dispela i no wanpela bikpela hevi tumas.

Bikpela wok tasol em long trenim na skulim ol manmeri long save gut long en bai ol i ken pilaim na sapotim.


Gelik futbol i no nupela long PNG, sampela wok i bin kamap long kisim i kam long PNG bipo we ol i bin traim tu long skulim ol manmeri long en tasol em i no kamap strong na i pinis gen.

Em i wanpela spot we i gat bikpela histri bilong en na i ken pulim planti sapota na pilaia sapos gutpela wok i ken kamap long skulim na trenim ol manmeri long en.

Kain ol nupela spot i ken kamap gut sapos i gat ol gutpela sapot na spona i kam long gavman na ol arapela kopret oge-naisesen.



PILAI GRAUN: Gelik futbol pilai graun i bikpela liklik moa long ragbi.



BILAS: Ol samting bilong werim long taim bilong pilai.



TUPELA INSAIT LONG WANPELA: Gol pos bilong ol i bungim bilong ragbi na soka wantaim.



TUPELA KAIN ROT: Yu ken holim bal na ron o kikim long lek bilong yu.



HOLIM EM: Yu ken takol insait long gem.



PASIM KAM: Ol unda 21 man soka trening long Bisini.



Trening hat long stap long skwad.



Wiken spots long poto...

Ol anda 21 meri stap long trening.



STRAIK FAUL: A Gret pri sisen sofbol pilai long Bisini..

Hanbol – Gem bilong han na bal



I GAT planti ol gem i stap we yumi long Papua Niugini no save gut long ol yet. Sampela bilong ol i save kamap long Olimpik Gems tu.

Taim yumi lukim, yumi save pilim paniliklik na lap long ol lain husat i save pilai, tasol yumi no save olsem planti bilong ol dispel gem i stap long taim tru na long sampela ol arapela kantri, em i save kamap bikpela tru long hap.

Wanpela long kain ol spot em hanbol (handball).

I gat planti kain hanbol gem i stap tasol dispela wik bai yumi lukluk long tim hanbol (Team Hand ball).

Hanbol i save kamap strong insait long ol kantri long Yurop (Europe) olsem Jemeni (Germany), Slovakia, Denmak (Denmark) na ol arapela ples klostu long ol.

Em i gem we i save kamap namel long tupela tim we ol pilaia i save tromoi bal i go long ol wanpilai bilong ol olsem long netbol na basketbol.

Astighting bilong gem em long traim na tromoi bal i go insait long gol bilong narapela we i luk olsem gol bilong soka.

Em i gat bikpela sapot long ol manmeri bilong ol ples we em i save kamap long en tu na em i spot we ol man na meri wantaim i ken pilai.

Histri bilong gem

I gat bilip olsem sampela gem olsem hanbol i bin kamap long Frans (France) na namel long ol Inuit pipol bilong Grinlen (Greenland) namel long 1400's na 1500's.

Long 19th senri (century) o 1800's, wankain gem ol i kolim handbold i bin kamap long Denmak na hazena i bin kamap long Sek Ripablik (Czech Republic).

Wankain gem ol i kolim hadzana in bin kamap long Slovakia, gandbol i bin kamap long Yukren (Ukraine) na torball i bin kamap long Jemeni.

Tasol stail tru bilong pilai tim hanbol olsem i save kamap tete i bin kirap long pinis bilong 19 sensri long Yurop namel long Denmak, Jemeni, Nowei (Norway) na Swiden (Sweden).

Wanpela Olimpik gold medol pilaia na tisa bilong Denmak, Holger Nielsen, i bin namba wan man long raitim ol loa bilong gem na i kamautim long 1906.

Bihain ol i mekim sampela moa senis long dispela ol loa bilong gem na namba wan intanesenel hanbol gem bilong ol man i bin kamap long 1925 namel long Jemeni na Beljium (Belgium).

Namba wan gem bilong ol meri bin kamap long 1930 namel long Jemeni na Ostrlia (Austria).

Fil handbol (Field handball) gem bilong ol man i bin kamap namba wan taim tru long Olimpiks long 1936 long Belin (Berlin).

Bihain long dispela em i no bin go bek long Olimpiks inap long 1972 Sama Olimpiks long Munik (Munich) olsem indo hanbol (indoor handball).

Tim hanbol kompetisen bilong ol meri go insait long Olimpiks long 1976.

Stail na loa bilong pilai

Tupela tim i save pilai dispela gem.

Wanwan long ol i mas gat 7-pela pilaia, 6-pela bai stap insait long pilai graun na wanpela em goli.

Astighting bilong gem em long tromoi



PILAI GRAUN: Hanbol long nau i save kamap antap long kot.



HOLIM: Hanbol bal na we bilong holim long taim bilong pilai.



PILAI: Hanbol bilong ol meri tu i save kamap strong.



KALAP: Ol pilaia bilong narapela tim i traim long pasim birua bilong ol long skoa.

bal i go long wanpilai bilong yu inap wanpela husat i stap klostu long maus bilong gol bilong narapela tim i kisim na traim long tromoi go insait long gol long skoa.

Narapela tim bai traim long pasim tim we i holim bal tasol ol i noken holim dispela pilaia husat i holim bal, taim ol i stap sait o baksait long em.

Ol i ken holim o pasim em taim ol i stap stret long ai bilong em na i givim baksait i go long gol bilong ol stret.

Bipo tim habol i save kamap strong aut-sait long ol pilai graun olsem soka tasol nau indo hanbol i kisim ples, we i ol pilaia i save pilai insait long hap we pilai graun

i wankain olsem bilong netbol na basketbol kot.

Ol pilaia i save werim su we ol bai noken wel na pudaun, na tu i gat karamap long lek na han skru bilong ol olsem ol volibol pilaia i save werim.

Longpela bilong kot em i nap 40 mita na bikpela bilong en inap 20 mita gat liklik gol olsem bilong hoki na soka i stap long wanwan het bilong kot we ol tim bai traim long skoa long en.

Hanbol long PNG

I nogat hanbol long PNG yet tasol wok i kamap nau long traim na kirapim dispela

spot long hia.

I nogat luksave save ol manmeri bai laik long traim o save long dispela gem tasol em i gutpela gem na i gat sans long kamap strong long hia sapos gutpela wok aweanes i kamap long skulim ol manmeri long en.

Em i no hat long pilai hanbol na i gat bilip tu olsem planti ol stail long pilai insait long dispela gem i save stap insait long ol arapela spot tu olsem soka, ragbi, volibol, netbol a basketbol tu.

I mas i gat gutpela sapot i kam long Gavman na ol arapela sponsa long kamapim gutpela pilai graun bilong en.

PNGFA Yut tonamen bai kamap long Madang

....anda 17 na 20 bai soim stail

James Kila i raitim

LAIWADEN pilai graun long Madang bai lukim planti kain kain naispela kala na stail bilong soka long neks wik taim PNG Futbol Asosesin (PNGFA) i holim Nesenel Yut Soka Tonamet bilong Anda 17 na Anda 20.

Dispela nesenel yut tonamen bai stat long Fonde, Novemba 15 na pinis long Sande Novemba 18.

Sif Eksekutiv Ofisa bilong PNGFA, Dimirit Mileng i askim i go long ol bisnis haus long kantri long givim helpim na kamap sponsa

bilong dispela bikpela soka tonamen we bai lukim developmen bilong ol soka pilaia bilong kantri.

Mileng i tok ol man bai holim tonamen bilong ol long dispela yia na ol meri em tonamen bilong ol bai kamap name long neks yia.

Nau yet PNGFA i askim i go long ol memba asosesin bilong en long salim tim bilong ol i go long dispela tonamen. Olgeta asosesin husat i memba long PNGFA i mas soim intares bilong ol long Fraide, Novemba 10.

Mileng i tok nominesen bilong wan wan time m K500 na ol tim i ken peim i

go insait long PNGFA Opreesen Akaun namba 1000146403 long ol BSP Benk insait long kantri.

Dispela nesenel yut tonamen em PNGFA bai yusim long glasim na pikim PNG Anda 17 na Anda 20 tim long pilai long ol Osenia Futbol Konfederesen (OFC) tonamen long 2013.

Mileng i tok ol asosesin i mas bringim ol rekot na yia ol pilaia mama i karim na krismas bilong ol i stap long en long taim ol i go long rejista.

Em i askim olgeta memba asosesin tu long redim ol gutpela pilaia bilong ol long soim stendet

bilong ol insait long dispela tonamen.

Mileng i tok ol yangpela pilaia em krismas bilong ol i mas 17 o 20 i mas pastaim long Disemba 31, 2012.

Em i givim bikpela tok tenkyu bilong em na PNGFA i go long Presiden bilong Madang Soka Asosesin, Siegfried Beschel long tok orait na i redi long lukautim dispela nesenel yut tonamen long Madang.

Olgeta memba asosesin bilong PNGFA na tu ol bisnis haus husat i laik sponsa long tonamen i ken ringin long dispela tupela namba em 72842299 na 76229484 long kisim moa infomesen.

10-Pela winim Courts dro bilong Fun Run

Nicky Bernard i raitim

TEN-PELA lain husat i ron long fan ran long dispela yia i kamap laki long Courts stoa taim ol i pulim nem bilong ol long bikpela dro bilong Courts, Trukai Fan Ran.

Courts Stoa em i wangepa bilong ol sponsa husat givim prais inap long ten tausen kina i go long ol manmeri na pikinini husat i ron long dispela yia fan ran.

Dispela fan ran i kamap long 13-pela provins na dispela dro bilong Court PNG inapim olgeta dispela provins.

Long mekim dispela dro, Andrew Lepani meneja bilong Spot Developmen i tok tenkyu long Courts long kamap wangepa spona bilong ol prais, em tok long fan ran i no bilong ol manmeri na pikinini long ron tasol long mekim mani bilong spot, tasol i gat sans long winim ol

prais olsem Courts Stoa i mekim long winim ol prais.

Long makim nem bilong Courts Stoa, PR na Promosen Kodineta, Lewa Kaiulo, i tok Courts i amamas tasol long givim prais long ol pablik husat i kisim taim bilong ol long ron long Olimpik Trukai Fan Ran, em tok tu olsem Courts i amamas long sponsaim ol bikpela spots olsem.

Ol prais Courts i givim em Split Air Kondisen yunit, 32

inch Panasonic flet TV ol haus kuk samting na sampela moa.

Ol 10-pela wina em, Adam Punai, Dickson Tairo, Cathy Honagili, Marvin Yarex, Peterson Basil, Lauku Milton, Martin Mickey, Agatha Igo, na Joel Yorokas. Ol dispela 10-pela wina mas ring go long Sport Federation na Olympic Committee long dispela namba 3251411 O 325 0114 long kisim prais bilong yupela.



Advertaising na Maketing Menija bilong Courts Allen Tom, PR na Promosen Kodineta bilong Courts, Trukai Indastri wokman Charles Paranda na Menija bilong Spot Developmen Andrew Lapani i soim ol dro ol pulim na ol samting ol dispela 10-pela wina bai kisim. **Poto Nicky Bernard.**



Wanem ol disisen yu ken mekim long las minit

NAU we PNG Gems long Kokopo em i redi long kirap, planti provins i no stretim gut olgeta ron bilong ol i go long Gems.

Wanem ol samting yu no stretim yet, i bihainim nau skelim tingting bilong yu. Ol disisen i no isi, na i ken brukim het tru, tasol yu mas inap mekim.

Nau we planti provins i wok long krai long kisim mani sapot, askim nau em bai yu kisim mani we? Husat bai givim yu dispela kain manimak yu nidim. Em sampela ol askim yu mas bekim.

Pastaim long yu mekim fainol disisen, yu mas glasim ol samting gut. Sapos yu no inap kisim samting yu laikim, orait, yu mas lukluk long ol arapela. Nogut yu ken daunim sais bilong tim i go long Gems.

Tingim ol sans bilong ol tim long kisim medol. Sapos yu mas katim hap namba bilong tim bai baset bilong yu i orait, yu mas mekim. Tingim. Bikpela samting em hamas mani yu gat long hanpaus bilong yu.

Traim na yusim wanem mani yu holim na stap. Dispela bai mekim yu stretim gut olgeta salens. Noken, na mi tok noken tru traime na inapim laik bilong olgeta wanwan etlit na opisal taim yu no nap long mekim. Dispela bai pulim yu go insait long kain kain ol hevi yu no inap stretim.

Olsem, sapos yu mas pilai insait long 14-pela spot, na nau, yu nidim manimak olsem K500,000 samting, o moa. Namba wan samting, em long skelim taim bilong painim dispela kain mani. Long painim kain mani olsem, insait long sotpela taim tru, em yu nonap.

Sapos yu no inap long painim mani yu nidim, wanem narapela rot i stap? Bihainim gutpela rot, bai givim bikpela presa long yu. Em nau, bai yu mas katim namba bilong tim. Olsem mi tok pinis, tingim ol spot i gat sans long winim medol. Dispela bai min olsem yum as katim daun namba bilong i etlit na opisal. Noken wari long bekim bilong ol. Yu mas tok klia long ol watpo yu mekim olsem. Tingim. Yu mas mekim wok bilong yu, na i no bilong amamasim olgeta manmeri tasol.

Taim de i pinis, yu bai mas bekim ol sut toktok na hevi i kamap. Mi no laikim yu tingting planti sapos yu no mekim olsem.

Traime dispela, sekim yu bai go olsem wanem. Gutpela bilong dispela em yu bai inap mekim samting, inap long strong bilong yu stret. Menesmen bilong tim i wok strong na ol bai kisim medol yu save ol i ken kisim.

Plis tingim long pilai sef, na noken go insait long trabel pastaim long gems i op. Yu bai no inap sindaun gut sapos sans bilong mekim nem long spot i lus long ol paul pasin nabaut.

Gut Lak long yupela olgeta.

Pri Sisen pinis taim bilong kilim skin

PRI SISEN bilong sofbol i pinis nau na dispela wiken bai nambawan raun bilong pilai bai ki op, planti bilong ol olupela tim bilong bipo i wok long soim strongpela pilai long pri sisen.

PNG Pawa em wangepa long strongpela tim husat i soim tru strong bilong em long pri sisen na laik kisim bek taitol bilong em gen taim em lusim long yia i go pinis.

Long dispela yia planti bi-

long ol pilai i senis tim go kam tasol strong bilong ol tim i stap yet olsem bipo.

Dispela wiken bai lukim Bisini sofbol pilai graun bai kam laip gen bihain long kam longpela malolo bilong pilai.

Plantil ol narapela senta tu i redi tu long ki op bilong sofbol pilai na PNG Gems em amamas pela wik long we na asples bilong sofbol long Rabaul bai pulap long ol manmeri bilong pilai.



Green Moon i winim 2012 Melbourne Cup



GREEN Moon, em **Brett Prebble**, husat i save stap long **Hon Kong** i bin stap long en i bin winim **Melbon Kap**.

Green Moon i bin hamarim ol narapela hos long **Tunde**, na winm siks-poin-tu milian dola **Melbon Kap** long **Flemington**.

Green Moon, husat i gat siks-pela **krismas**, i bin kisim trening aninit long **Robert Hickmott** na wan-pela sempion joki, **Brett Prebble**,

husat i bin kam long **Hong Kong** long raidim dispela hos.

Mista Lloyd Williams i papa bilong dispela hos.

Gai Waterhouse i wok long traim hat yet long winim wanpela **Melbon Kap** bihain long **Fiorente** i bin kamap namba tu, pastaim tasol long **Jakkalberry**, husat i bin kamap namba tri.

Bihain long dispela resis, **Mista Prebble**, husat i save i bin wok bipo hia long **Melbon**, olsem wanpela joki i bin go long **Hong Kong** long 2002, na em i bin tok tenkyu long **Mista Williams** long larim em i resis wantaim **Green Moon**.

"Dispela em bilong yu, bos. Mi tok tenkyu long yu long sapot yu givim," **Mista Prebble** i bin tok.

"Dispela em res em i ken winim isi tru."

Prebble i bin winim **Hong Kong Dabi** long 2002 na 2007, tasol em i save kam bek long **Australia** long resis long ol bikipela hos resis.

Johnston's Pharmacies



All Sports and First Aid requirements



For First Aid Kits. Remington Hair Clippers, Remington Hair Appliances, Varta Batteries

**P.O. Box 1066 Boroko
Phone: 325 3185, Fax: 325 0190
Email: sales@johnstons.com.pg**



Bungim ol Wol 2 veteranen bilong PNG na Australia...

Kokoda Woa memoriel sevis long Ela Bis...



PNG i welkamim Prins Charles na Camilla

Veronica Hatutasi i raitim

SAN i wok long go daun isi isi long las Sarere apinun, tasol intanesenel teminel long Jackson's Ples balus long Mosbi i pulap long pipel i stap.

Pulap long pipel, yangpela, lapun na ol skul sumatin, tasol nogat wanpela nois. Skai i klia, tasol sampela pisin i pulim lain na i plai we i mekim ples i luknaus.

Moa yet, eria we ol i save wetim ol bik manmeri i kam long en. Na olgeta hap i raunim hap bilong wet na ol rot long ples balus i go olsem long 7 na 6 Mail na Erima olgeta.

Dispela wet (wait) i bilong wetim namba wan pikinini bilong Kwin Elizabeth 2, Prins Charles na meri bilong em, Dasis bilong Konwal, Camilla Parker. Tupela i wok long kam long PNG olsem hap bilong selebretim Daimon Jubili o 60 kris-mas bilong Elizabeth 2 olsem Kwin bilong Ingran na ol 54 Komonwel kantri long wol we PNG i hap long en.

Stret kilok i tasim 5.45 apinun, Royel Australian Air Force (RAAF) balus i karim tupela Royel Famili na liklik lain bilong ol i pondaun long Jackson's Ples balus.

Taim Prins Charles i kamaut na sanap long dua bilong balus, ol tausen pipel i wokim bikipela singaut bilong welkam, na long wankain taim tu, 21 gan salut



WELKAM: Praim Minista Peter O'Neill i sekanim Prins Charles tai mol i kamap long PNG las wik Sarere. Poto: Nicky Bernard

pairap bilong PNG Difens Fos i strongim dispela welkam i go moa yet.

Ol intanesenel na lokol midia tu i no isi. Planti nius manmeri bilong Briten, sampela bilong Australia na PNG yet i stap long franlain long kisim ol poto na nius long wokabout bilong Prins Charles na meri bilong em, Camilla em Dases bilong Komwol.

Stat yet long Sarere, Sande na long dispela wik Mande taim ol i bin lusim PNG, ol dispela nius manmeri i bihainim Prins Charles na Dasis long olgeta hap. Long ol ripot na poto bilong ol niuslain ya we i kamap long TV, redio, niuspepa na intanet, pipel long PNG na wol i bin save long ol samting i karamapim wokabout bilong dispela bik man na meri.

Retpela kapet em ol i rolim long hap we steps bilong balus inap long en long Prins na meri bilong em i wokabout i kam daun olgeta long hap bilong wet we ol bin redim long opiseli welkamim Prins Charles na meri bilong em.

Taim Prins i krugutim graun lobb ples balus, Jessie David, em wanpela long ol skul sumatin grup i bin wokim welkam Hiri kalsa danis i bin

putim okid flawa lei i raunim nek bilong bikman.

Praim Minista Peter O'Neill na meri bilong em Madan Lynda Babao, PNG Difens Fos Komanda, Brigadia Jenerel Francis Agwi na meri bilong em i bin welkamim Prins Charles na meri bilong em.

Royel PNG Polis Ben i gat long e m ol ben memba bilong taurama na Moem Bareks i bin pilaim gutpela welkam musik na neseni entem bilong Ingran em God save our Kwin, na PNG neseni entem tu.

Taim ol kar i karim Prins Charles, meri na lain bilong ol i lusim ples balus, ol pipel i bung long sait sait i amamas nogut tru na ol i ron singaut, tasol ol i no wokim wanpela trabel.

Kar i bin kisim tupela na ol lain bilong ol i go long Airways Hotel we ol i bin stap na slip long en long tripela de wokabout bilong ol long PNG.

Bihain long dispela, Gavana Jenerel se Michael Ogio na Ledi Ogio i bin bungim Prins Charles na meri bilong em long Air Wyes Hotel we wanpela seremoni i bin kamap na Prins Charles i bin prisanim ol luksave Logohu medal awot long Se Michael na narapela liklik lain.

Bihain long dispela, Prins Charles na Camilla i bin malolo long skruim gen ol wokabout bilong ol neks de.

Wanem tingting bilong pipel long wokabaut bilong Prins Charles na Camilla?

Kam bilong Prins Charles i bikpela samting

OL pipel i tok wanem long raun bilong Prins Charles i kam long PNG:

Pipel long PNG i welkamim na amamas long wokabaut bilong Prins Charles i kam long PNG. Olgeta hap em na lain bilong em i go, planti pipel i bin kamap na givim bikpela tok welkam long em.

Hia em toktok bilong sampela PNG manmeri long wokabaut bilong bikman:

Pastor Oswald Tamanabae i tok: "Dispela em i wanpela bikpela samting bikos em i makim PNG i stap long taim bilong senislong senis na i kisim luksave long Komonwel.

"Olsem wanpela Komonwel kantri, PNG i wokim ol kontribusen bilong em olsem wanpela indipenden kantri, sevan nesen i gat planti naturel risos long en.

"Wol i luksave long PNG long sait bilong woa, ol misinari i bin kam na ol koloniel lain long politikel

sait. "Kam bilong Prins Charles i makim olsem kantri i bikpela pinis. PNG nau i kamap papa bilong kalsa bilong em na long dispela yia 2012, PNG i wok long kisim ples bilong em olsem wanpela kantri i gat luksave long wol," Pato Tamanabae i tok.

Em i amamas long Prins Charles i kam long kantri long namba 4 taim nau. Pastaim em bin kam long 1966 taim em i yangpela mangki i gat 18 krismas na stap tupela wik long Matyrs Bois Hai skul long Popondetta, Oro Provins long lukim na bihainim kain laipstail, kalsa na pasin bilong pipel.

Bihain long taim PNG i kisim indipendens long 1975 we em bin makim Kwin mama bilong em, namba tri taim PNG i bin opim nupela Haus Tambaran (Palamen) long 1985. Na nau em namba 4-pela taim long makim Daimon Jubili bilong Kwin mama bilong em.



BIKPELA SAMTING LONG KANTRI: Pasto Oswald Tamanabae (wantaim aiglas) i go pas long Higher Vision Ministri, papa na mama bilong em, Reveren Thomas Erage Tamanabae OBE, na meri bilong em Grace wantaim tu meri bilong Pasto Oswald em Elly Kouru Tamanabae. Poto: Gavana Jenerel Midia

Prins Charles gat gupela toktok long kantri ...Tingim raun bilong em long PNG taim em i yangpela

Veronica Hatutasi i raitim

PIPEL bilong Papua Niugini i bin givim gupela welkam na gutbai stret long Prins Charles na meri bilong em Camilla, Dases bilong Konwal, long tripela de wokabaut na stap bilong ol long dispela kantri.


Se John Guise Stadium long Pot Mosbi em hap we planti tausen man meri na pikinini i bin gat sans long lukim na welkamim namba wan pikinini bilong Royel famili na meri bilong em.

Stadium i bin pulap kapsait long pipel long las Sande we pablik tok welkam i bin kamap na Praim Minista, Peter O'Neill i bin wokim tok welkam long makim pipel bilong dispela kantri.

Tasol ol pipel i bin pulap long bikpela amamas na singaut klapim han strong long stadium taim Prins Charles i toktok long Tok Pisin long autim amamas na tok tenkyu bilong em long kam long PNG, kantri i no nupela long en, tasol we em i raun i kam long em long namba 4 taim.

"Mi namba wan pikinini bilong Misis Kwin na namba wanpela ten lapan (sif) bilong Manus. (Em bin kisim dispela taitel taim em i raun i go long hap long 1975). Mi bringim bikpela tok amamas bilong Mejesti Kwin bilong PNG na olgeta hauslain bilong mi long dispela taim bilong Daimon Jubili bilong Misis Kwin. Mi tok Pisin orait?", Prins Charles i bin tok olsem long Tok Pisin.

Taim Prins Charles i autim tok amamas bilong em long pipel bilong PNG i makim Daimon Jubili wantaim amamas na selebresen, em bin toktok tu long tupela wik em bin kam stap long Matyrs



Prins Charles i tok gutbai long PNG taim em kalap long balus na go raun long Australia. Poto: Nicky Bernard

Bois Angliken Memoriel Skul long yangpela bilong em long yia 1966, taim em bin gat 18 krismas tasol.

"Mi no inap lusim tingting long sotpela stap bilong mi long PNG we mi bin lainim olsem kalsa i bikpela samting long PNG.

"Mi tingim ol dram i wok long pairap long sampela de long Wedau long wetim kamap bilong mi long PNG long dispela taim," Prins Charles i bin tok long planti tausen man meri na pikinini, ol lida bilong gavman, sios na ol skul sumaitn husat i bin bung long stadium long wokim misa lotu long selebretim Daimon Jubili bilong Kwin Elizabeth 2.

Em bin autim tok amamas tu long gupela na kala kala soim bilong kalsa i pipel na moa long 3,000 skul sumaitn bilong ol skul insait long Nesenel Kapitell distrik i bin putim kamap.

"Mipela i lukim naispela kalserel so long dispela moning. "PNG Way" em i gupela prodaksen i soim ris na kliapela kalsa na pasin tumbuna we PNG i gat nem long em. Bikpela amamas tru long naispela so yupela i putim kamap," Prins Charles i tok.

Em bin luksave tu long wok bilong ol Royel Pasifik Ailan Rejimen o PNG polis na tu, ol PNG Difens Fos na moa yet, wok we ol Fuzzy Wuzzy Angels i bin mekim long helpim ol Australia na ol pren soldia na winim pait long Kokoda Treil.

Em bin luksave tu long PNG nau we sampela soldia bilong PNG Difens Fos i stap long ol ol rijinel na intanesenel Pis Kiping fos.

Long pinisim ol toktok bilong em, em bin Tok Pisin gen olsem:

"Yupela olgeta lida, ol pikinini, ol sumatin, ol man na meri, ol lida bilong sios na ol pipel bilong PNG. Mi na misis bilong mi, itupela i laik tok tenkyu tru long yupela olgeta long gupela pasin bilong amamas yupela i mekim long mipela long kamap long PNG.

"Mi sori tru long lusim yupela kwiktaim, tasol mi go long sampela moa kantri we Misis Kwin i bosim, nap les i kol liklik.

"Ayoo! Bamahuta bona dirava hese baine hanamo mui," Prins Charles i bin pinisim toktok bilong em.

Planim mangro givim tingting

Veronica Hatutasi i raitim

Vada Dago em tim lida bilong Mangro planim projek long Boera Viles long Sentrel Provins we Prins Charles na Camilla i bin wokim raun i go long Sande apinun long lukim pasin kalsa na tumbuna na tu, planim mangro diwai long nambis bilong dispela ples i gat moa long 6,000 pipel long en, i gat dispela toktok:

"Mipela ol pleslain i

amamas stret long Prins Charles i kam lukim komyniti bilong mipela long ples. Mipela i amamas moa yet long Prins i kam lukim kalsa na pasin tumbuna bilong mipela, kain laipstail bilong mipela, pising o painim pis na planim mangro diwai.

"I gat nit long mipela i planim ol diwai mangro long wanem, namba bipel long ol i wok long go daun bikos pipel i katim long mekim haus na yusim

olsem paiawut.

"Long Prins Charles i kam long ples na planim mangru bai kirapim tingting long mipela i opim ai na lukautim ol mangro bilong mipela na ol pis na kuka na ol abus bilong solwara i ken kam long mangru i ples stret bilong ol.

"Planim mangru projek i yusim tu ol yut bilong dispela ples long mekim sampela wok na ol i ken stap bisi," Ms Dogo i tok.



PLANIM MANGRO: Prins Charles i laik planim wanpela yangpela mangru diwai long Boera Viles na strongim projek bilong ol. Poto: Nicky Bernard



ROYAL VISIT PAPUA NIUGINI 3-5, 2012



Pundaun long Jekson ples balus na bungim ol PNG delegets...



PNG Difens givim em Gad ov Hona...



PNG Difens na Polis pairapim musik...